

Aroma Ebeq sáhnsahwe ahbebé ehwehne.

Poraga mah pahsí sehiranue mó aní awuwana wega Aroma suwahpeq mewena mibeq Sísa tagariáh ké móriewe. Mah pahsí áawahewé mahraréna, Ite moke ahhbabáq ke míone. Mósísiga miraoro ú ehweh sehgiunaga ite íre kaweraitahráhire. Itega kaweq arámbéhríúnaga moq íre kaweraitahráhire. Peh morá Sísansabé aíq pútare atonaga wega ite kaweraitena organúq itahráhire. Manikáne Awanka Sísansabé aíq pútare atáh ké séhréh aritena kaweq sansá miraoneheqmúne íwíáh aritena ahriahri sereq mía míaire. Poraga mah ehwéh Aroma suwahpeq Sísa tagariáh ké náriu pahsíípéq sehiranúwe.

Aroma suwahpeqte ké siu pahsíe.

Poraga wene arambehriyabé teriu ehwéhne.

¹ Íné, Pora Sísa Karáhéne arambehriu aní múge. Manikáne ehweh korerinkeheéna omaq intena eq-maq núwátáire.

² Naho nahó Manikánka omasa éhwéh wene ehweh irarú ke iwiáh aritowara áwahe pukúípéq sehiranuwe.

³ Omasa éhwéhmé wenahni, itene Wahnah Sísa Karáhé éhwéhne. Sísawe wehukení úkúnsabe anotah wahnáh aní, Tébiti kahnáh ánínéna

⁴ we pukútaq Manikánka págege sansánue iriwe organúq atowe. Oganúq atonsabe Manikáne

Awanka ite sokigi aitéhmé we Manikáne ahninkáwá wíre. We Sísá Karáhé itene Wahnahne.

⁵ We nahnsó kereqne Wahnah míankeheéna Manikánka ite meiqme Sísá Karáhéne ayahpi itena anotahtaq séhréh aitéhre. Wega íné nahnsó kebá eqmaq núwátáire. Mó kehiná mó kehinánká Sísansabé aiq pútare atera wene ehweh sehgiheéna kosíwáhnorúno éna eqmaq núwátáire.

⁶ Ite moq Sísá Karáhéne animári míageheéna omaq itena íáhraburaire. Íáhraburaira ite Sísá kéráhwe.

⁷ Aroma su wahpeqte Manikáne animáríno, íné Porane ehweh íráhro. Manikánka itensabé arutaboiraítena wene animári míageheéna íáhraburaire. Maniká Iteriboreq itene Wahnah Sísá Karáhéraqka ite séhréh aitera itene iru ukiq itagéhe.

Poraga Aroma ke ehweh korerieyabe awahbo ehwéhne.

⁸ Téhwe teiéna ehwéh íráhro. Itega Sísá Karáhéne ehweh kawerue sehgóímé áhnte kegá íráhwe. Minayabe ínéga ite ómi níahreraq matawéna Sísá Karáhé áwírue Manikánsabe iwíáh iwíáh atóge.

⁹ Sísá Karáhé éhweh teri terinéna Manikáne arambehriyabé iwíáh iwíáhéra mirauge. Manikánka tagaríehmé íné íre túbah agia

¹⁰ itensabé ahriahri púreraitóge. Ite tagéyabe nuwahbehre. Minayabe Manikánsabe págegeue púreruge. Púreréna mahraréna, Aroma kebá pokiniboq pokúno ainte séhréh ainto ue púreruge.

¹¹ Itene irupipeq págegeinkeheéna Manikáne Awanka séhréh aitahráhire. Wega mirainkeheéna iteba sure séhréh aiteyabe nuwahbehre.

12 Ínéga Sísane ehweh kawerue sehgiúnsábé itega íné tagehrataq itene iru kawerinae. Itega moq Sísane ehweh kawerue sehgiónsábé tagahnaraq nirume kawerinae. Minayabe moke irupipeq eyoyóinae.

13 Néne iyahnabo anímáríno, teiéna ehwéh iahtebagehboq íráhro. Áhntetaq iteba pokinieurautaq íre pokorahurauge. Sísane ehweh teríátáutaq mó nahnsó kégá aiq pútare atera sehgiówe. Ite moq aiq pútare ateq sehgeheéna teieyabe nuwahbehre.

14 Manikánka ómi korerio urainsabé Káríki kereq íre Káríki kereq ahtebah kereq múgu wahgu kereq teri terininie.

15 Itega moq Sísa éhwéh irageheéna ite Aroma suwahpeq míáh ké koreiyeyabe nuwahbehre.

*Kaweq ehwéhmé Manikáne págegeorahi
sansásábé teí éhwéhne.*

16 Manikánka Sísane kawequehnsabé ómi aiq pútare atáh ké kawerarítéhre. Minayabe mi ehwéh terieyabe íre niyehitehre. Maniká págege aní púana séhréh aitahráhinsabé ite koreiyeyabe nuwahbehre. Téhwe Asiu kegá mi ehwéh írówara anehe nahndonka írówe.

17 Wehukega Sísane ehwehnsabé aiq pútare atáhtáq Manikánka kaweraritená sensabé, Ite kaweqlaq míáhwe arítéhre. Íre wehukega arambehrlionka peh morá wensabé aiq pútare atáhnká kawerarítéhre. Mi kawérarítéh sánsámé Manikánka aiq sokigi aitéhre. Minayabe Manikáne ehwehnka aiq mahraréna,

Manikánka wensabé aiq pútare atáh kékáyabé,
 Kaweqtaq míáhwe arítéh púara se oga mía
 míaoneherawoe ire. *(Habakuk 2.4)*

Maniká auwera múguwahgu ke úko ehwéhne.

¹⁸ Manikánka íópeq ména wene áyáteh naneq sansá sokigi aíre. Ahbarera ahkaragára kené ahkaragáraga Manikáne aiq pútaq sansánsábé ahqáho atáhwe. Ahqáho atáh púana Manikánka anotahtaq abiahnsanéna kamah arinkéhe.

¹⁹ Maniká wewega wene sánsá tábúsoqme sokigi ariátái puara wehukega tagariahrahewe. Tagari-ahrahonsabé wene sánsánsábé ahqáho atáh púana Manikánka anotahtaq kamah arinawire.

²⁰ Naho naho Manikánka mah marákó márákó mirarowe. Wega kaweqtaq mía míáéna moke miraro mensáméhnsá ábóraq marowe. Amahnága minawari kéhrara wehukega taga tagao puara wene sánsá tagariahrahewe. Tagéra iwíáhorahome Maniká webataq Manikánéna ahriahri págege aní mía míaire. Minayabe mi ahbábáq kégá Manikánsabe, Arene sánsá peh kopípéq kékre íre irarerahowe. Írakaumo.

²¹ Segá Maniká tagarawéra wensabé, Are Maniká Iteribo wóne íre owe. Arensabé iwíáh iwíáhonehqume íre owe. Wensabé kaweróne íre atáhwe. Minayabe se múguwahgu agéra tábúsoqme iwíáh íre iwíáhia peh sunkíkírirabeq míáhwe.

²² Ite ahtebia kéké úne éra saiyoéra múguwahgu ke úkowe.

²³ Manikánka anotah aní ména ahriahri mía míairara wehuke íre mía míaowe. Maniká auwera abehq náneq wehukéni awankátate kuruqme mirarera minawarinsábé iwíáh iwíáh atáhwe.

Kabarame ménkámehnkámé karahrabahme abehq náneq awankátate kuruqme mirarera, Itene manikáne éra minawarinsábé iwíáh íwíáh atáhwe.

Ómiga ahbabáq aruqaruro ke wóe i ehwéhne.

24 Segá mirao puana Manikánka se suena áwé tagehrara sene sirupipeq sirutaboiro ahbabáq mira aruqarurowe. Wahba soberuqnahbaruron-sabé ahbabárowe.

25 Manikáne aiq pútaq sansá suera péhepehe iwíáhéra wene sánsá íre sehgówe. Maniká moke náneq miraro anínsábé íre iwíáh íwíáhia peh Manikánka miraro naneqmarinsabé iwíáh íwíáhowe. Manikánka moke náneq miraro puaq wensabé iwíáh íwíáh atonawe kaweq sansáne. Aiq pútaq míre.

26 Segá mira áhbábáronsabé Manikánka se suena áwé tagehre. Áwé tagehrara segá áhnte íre mirao naneq miraéra ahbabáq aruqarurowe. Ahreronká sensuwehqso suera síwáhu ahréróné sinonka soberuqnahbarurowe.

27 Wehga moq sene ahrero suera síwáhu wehné sinonkansabé sirutaboiréra soberuqnahbarurowe. Mi sansámé anotah siyehiteh sansánirara pehipi mira aruqarurowe. Segá mira áhbábáq aruqaruro puana sene iwíáhwé sene sinonkame íre kaweragire.

28 Segá Manikánsabe iuwahriehre íwíáho puana Manikánka se suena áwé tagehrara segá ahbabáq iwíáhéra íre mirao naneq miraowe.

29 Sene sirupipeq áhnte ahkaragáraakáq ahbabáqkakaq kéhre. Áhnte mensáméhnsánsabé

sirutaboiro ke wóe. Íre tábúsuréh sánsáno ke wóe. Ebehyabé suwahbeh ke wóe. Mó kené ménsámehnsánsabe aigará pabeki ke wóe. Wehuke subiq sueyabe suwahbeh ke wóe. Se tobéh aruqaruro ke wóe. Se péhe éhwéhnue mó kené ménsámehnsá mewe meweo ke wóe. Mó ke íre kawerarítáh ké wóe. Síehruru aruqaruro ke wóe.

30 Mó keyábé péhe éhwéh arítáh ké wóe. Manikánsabe suwahrieh ke wóe. Aboawah weh áhréyábé abehq éhwéh arítáh ké wóe. Se saiyoéra seye síwíq pankeráh ké wóe. Ahbabáq áhwárah ke wóe. Sinoibone ehweh anterúáh ké wóe.

31 Se múguwahgu ke wóe. Itega miraoneheqmúne e éhwéh anterúáh ké wóe. Sensuwahrahyabé íre suwahbeh ke wóe. Mó keyábé iuwahriehre éra íre séhréh arítáh ké wóe.

32 Manikánka mina tahnsa pukorahi ahbabáq aruqaruro ke kamah arinawire. Segá minayabe irera anetaníbo íwíáhowe. Anetaníbo íwíáhéra mira ahbabáq aruqaruréra mina tahnsa áhbábáro keyábé kawerowe aritera íwíáh íwíáh arítáhwe. Manikánka moke mina tahnsa áhbábáq ké anotah-taq kamah arinawire.

2

Manikánka ómi kené arambehri tagéna sain-suahna éhwéhne.

¹ Néne iyahnabo anímáríno, ite íwíáhome mi ahbabáq ké íre kaweq ke wóe éq peh ite kaweqtaq mía míauñe íwíáhowe. Aneqsabé mira íwíáhoo? Itega moq mi ahbabáq mira aruqarurowe. Se ahbabáq ke woe eme iteitensabéákáq mirarewe. Itega moq mi ahbabáq mirao puaq iteitensabéákáq

mirarewe. Minayabe, Ómi itega kaweqtaq mía míaúne íre irarerahowe.

² Ite tagarionawe Manikánka tábúsoqme iwíáhéna mina tahnsa áhbábáq ké ehwéh aritena kamah arinawire.

³ Se ahbabáq ke woe íwíáhéq itega moq mi ahbabáq mirao mino? Néne iyahnabo anímáríno, Manikánka ite íre kamah ainawire íwíáhoo? Ahqáho. Wega moke ahbabáq ke monseráhnue kamah ainawire.

⁴ Manikánka itensabé arutaboiraitena íwénunire. Íwénunéna íre apubúue kamah aíre. Minayabe, Anetaníbo. Pehipi ahbabáronehe íwíáhoo? Itene ahbabáq sansa sueq wene sásá sehgigeheéna Manikánka itensabé arutaboiraitena íwénunire. Minawé íre ahtebaho?

⁵ Itene ahbabáq sansa íre sueq peh píribahriéq, Ite iuwahbeh sansá miraoneheqmúne íwíáhonsabé itene ahbabáq áhnte aginae. Áhnte agirana Manikánka ehwéh aitahna tanáhráq tábúsoqme iwíáhéna anotah kamáh ainawire.

⁶ Wega wehukene arambehri agehmarena ehwéh aritena sainsuanawire.

⁷ Mó kegá Maniká míéhrabeq téhrehrabeq pokéra we tahnsá méyabe suwahbehre. Manikánka sensabé, Kawerowe ariteyabe suwahbehre. Ahriahri oga mérapeq pokéyabe suwahbehre. Mina tahnsa suwahbeh kegá kaweq sansá mira aruqarurirataq Manikánka organúq sitankéhe.

⁸ Mó kegá peh seyene íwíáh mira aruqarurowe. Segá aiq pútaq sansá íre sehgira peh ahbabáq aruqaruro puana Manikánka mi keyábé anotah abíáhnsá aritena kamah arinawire.

9 Manikánka moke ahbábáq ke kamah arinara síérinayabé uwo uwo oneherawoe. Téhwe Manikánka ahbabáq Asiú ké kamah ariena anehe ahbabáq nahnsó kéákáq kamah arinawire.

10 Manikánka kaweq sansá mira aruqaruro keyábé, Kawerowe aritena siru ukiq sitena, Néne téhrehrabeq kíoro. Anotah anímári míagehe aritankéhe. Téhwe wega kaweqlaq míah Ásíú kékabé mirareritena anehe kaweqlaq míah náhnsó kékabé mirareritankéhe.

11 Manikánka moke mi kené arambehri agehmarena tábúsoqme iwiáhéra saraqmarena sainsuanawire.

12 Nahnso kegá Mósísiga sehgóro ú ehweh siahrerate íre irera sega ahbabáronsabé iraipéq pokigehe. Asiu kegá Mósísine ehweh irera ahbabáronsabé Manikánka Mósísiga sehgóro ú ehwehnká irarúnserahnue ehweh aritena kamah arinawire.

13 Asiu kegá Mósísine ehweh sene siahrerate íráhwe. Minayabe Manikánka mi keyábé, Ite kaweqlaq míahwe pehipi irareritankéhbo? Ahqáho. Írakaumo. Peh morá moke mi ehwéh sehgó kékabé, Ite kaweqlaq míahwe irareritankéhe.

14 Nahnso kegá mi ehwéh siahrerate íre irera pehipi sehgónsabé sirupipeq kaweq sansá ahtebahwe.

15-16 Mi ehwéh íráhnsabé sehgioo? Ahqáho. Manikánka sirupipeq kaweq sansá arítéhnsabé sehgówe. Segá ahbabárotaq sirupipeq umeh agirara kaweqlaq míáhtáq sirupipeq eyoyó agire. Ínéga kaweqlaq ehwéh teiúmá Manikánka Sísa Karahénsabe, Wehukene sirupipeqté épéráhpéro

sansánsábé sainsuo atéhre. Minayabe Sísa tuina tanáhráq wehukene sirupipeqté sánsánká seye sainsuankéhe.

Asiu kegá Mósísine ehwehnka séhréh aitankéhe íwíáho ehwéhne.

¹⁷ Itewe árahoo? Ite Asiu anímári múne éq Mósísine ehweh sehgiune éq ite Manikáne animári múne irare irareowe.

¹⁸ Maniká awahbeh sansá tagarione éq Mósísine ehweh aiq ironé éq minayabe ite tábúsoqme iwiáhorahúne ewe.

¹⁹ Ite iwiáhome itewe Manikáne ah íre tagaríah ké sokigiúna anímári múne íwíáhowe. Sunkíkírirabeq míah ké kawerue nogigeheéq ite sene kánéq tahnsha míone íwíáhowe.

²⁰ Áhwára áhwára ke kaweraritone íwíáhéq káriq anímárínseq íre íráh kéréq síwáhnorúne íwíáhowe. Mósísine ehweh matawéq aiq moke iahtebóna puaq mi arámbéhrí miraorahúne íwíáhowe.

²¹ Itega mó ke síwáhnoréq mina síwáhnoro ehwéh aneqsabé itewe íre sehgioo? Itega mó keyábé, Aebóiyeho eme aneqsabé itewe aebóo?

²² Itega mó keyábé, Mó kené ahre abariiyeho eme aneqsabé itewe mó kené ahre abarioo? Itega mó keyábé, Abehq náneqsabé manikáne ateq iwiáh íwíáh atého eme itewe aneqsabé péhepehe maníkáné árótu nahtápéq kék náneqmarí aebóo?

²³ Itega iteitene íwíq pankereq Manikánka sehgíoro i ehwéh teri terinome itewe aneqsabé mi ehwéh anteruaho? Mirairataqmé Manikánsabe éhruru atáhwe.

²⁴ Manikáne ehwehnka mahraréna,

Itega ahbabárirataq nahnso kegá tagéra
Manikánsabe éhruruorahowe ire. *(Aisaia 52.2; Esekiel 36.20-23)*

Mina onserah itega Manikáne ehweh
anterúáhnsábé tagah kegá wensabé éhruruowe.

Íre síu amurúráhnsábé Asiu keúrá míáhwe i ehwéhne.

²⁵ Ite Asiu kegá íú amurúrueq Manikánka sehgióro i ehwéh sehgiónaraq aiq kawerire. Wene ehweh anterúáh Ásiú kewé nahnso ke síu íre amurúráh ké tahnsa úkowe.

²⁶ Síu íre amurúráh kégá Manikáne ehweh sehgiótáq wega sensabé, Ite Asiu keúrá tahnsa míáhwe arítáhwe.

²⁷ Ite Asiu kewé íú amurúruona kewé Manikáne ehweh kékraq íre sehgiówe. Minayabe nahnso ke síu íre amurúráh kégá wene ehweh sehgiótáq ite Asiu kegá minayabe tagéq íre kawerurone íwíáhigehe.

²⁸ Asiu anínurame insebo? Peh morá wene áú amurúrutai aní Asiu anínura mire íwíáhoo? Irakaumo. Íre minayabe Asiu anínura míéhre.

²⁹ Íre peh síu amurúráh sánsá miraonka Asiu keúrá úkowe. Íre púkuipéqté ehwéh íráhnká peh morá Manikáne Awanka wehukene sirupipeq sogiqtaté tahnsa amurúréhnká sirupipeqkákqák sene iwíáhipeqkákqák kaweraritéh ké Asiu keúrá úku úkuowe. Íre wehukega peh Manikánka mina tahnsa kékabé, Kawerowe arítéhre.

3

Manikáne sansá peh kaweq sansáne i ehwéhne.

1 I te Asiu kené sánsánká nahndo kené sánsá kiotaikiro? Íú amurúrue sansa miraonsabé aneq kaweq naneq kanabo?

2 Manikánka áhnte kawéq naneq ite Asiu ke nái náinúwe. Téhwe Manikánka wene ehweh ite Asiu ke teiena, Néne sánsá auráq matíahro aitowe.

3 Mó Asíú kégá Manikáne ehwehnsabé íre aiq pútare atówe. Íre aiq pútare atónsabe Manikáne ehweh abehq úkiro?

4 Írakaumo. Peh aiq pútaq ehwéh kagaire. Minayabe Manikáne ehwehnka irarinserahnéna,

Arega iraréna ehwéh aiq pútaragirkehe.

Aiq pútaragínara wehukega tagagehe.

Wehukega ehweh atéhrataq arega se kiotaikinkehe ire. *(Buk Song 51.4)*

5 Wehukega iwíáhue iraréra, Itega ahbabárúnaga Manikáne tábúsuréh sánsá ábóraq máréhre íwíáhowe. Mira íwíáhéra, Minayabe Manikánka kamah ainawe we áhwára áhwára iwíáhéná íre kawerire ewe. Mah iwíáhwé peh wehukene iwíáh wíre. Ite mina tahnsa iwíáhonehnkono?

6 Ahqáho. Írakaumo. Mi iwíáhwé peh abehq íwíáhe. Manikámé áhwára áhwára iwíáhi aní tahirímé wega mah kehiná kéhíná íre tábúsoqme ehweh aitéh irino.

7 Wehukenínká mó iwíáhue iraréna, Ínéga péhe éhwéh irarunka peh Maniká aiq pútari aní míre ue ábóraq máréhre íwíáhire. Iwíáhéná, Minayabe néne péhe éhwéh íráh kégá Manikánsabe iwíáh íwíáhigehe ewe. Mira íwíáhéná, Wega néne ahbabáqsabe ehweh aintahnawé árahinsabébo? Ehweh aintéhmé we áhwára áhwára iwíáhéná íre kawerire ewe.

⁸ Mina tahnsa íwíáho kegá, Pehipi ahbabáronehe ewe. Ahqáho. Manikánka mina tahnsa íwíáho keyábé ehweh aritená kamah arinawire. Kamah arinawe ábéraranawire. Mó kegá péhenéra, Íné Poraga mahraréna, Itene ahbabáqka kaweq sansá ábóraragire éna minayabe pehipi ahbabároneheqmúne síwáhnorire ewe. Írakaumo. Mi kewé péhe éhwéh aintáhwe.

Mó morá kaweqtaq mía míai aní íre míéhre i ehwéhne.

⁹ Aneq iwíáhonehnkono? Nahnso kegá ahbabárowaqme peh morá ite Asiu ke kaweqtaq míone íwíáhoo? Ahqáho. Írakaumo. Ahbabáqka ite Asiu kereq nahnso kereq ite ómi saiqnariéhre teiú mino?

¹⁰ Minayabe Manikáne ehwehnka aiq mahraréna,
Kaweqtaq mía míao ke míaho?

Írakaumo, Íre míáhwe.
Mó morá kaweqtaq mía míai aní írakaunuránowe.

¹¹ Maniká awahbeh sansá sega íre ahtebahwe.
Wensabé iuwahriehre éra we íre anebahrowe.

¹² Ómiga Manikáne ahme aiq súáhwe.
Suera moke abehq ke úkowe.

Kaweq sansá mirai anímé mó morá
írakaunuránowe.

¹³ Sirupipeqté éhwéh íre kaweq ehwéh púara
pusa ké karesa kúnkúninserah ke wóe.
Sene áwéhipeqte péhe éhwéh kisuq kisurowe.
Wehenka wehuke pehtaq pukorahi naneq we-
hukene sinonkapipéq sítéhnserah sene péhe
éhwéhniká wehuke íre kawerarítéhre. (*Save-
man 7.20; Buk Song 5.9, 14.1-3, 140.3*)

14 Segá ehbo ehwéhnkákáq tobéh ehwéhnkákáq
irare irareowara mó kené sirupipeq umeh
arítáhwe. *(Buk Song 10.7)*

15 Segá mó ke peheráhnue subiq suq subiq surowe.

16 Pokorabeq mibeqté ké ahbabáq aritera
íre kawerarítáhwe.

17 Mó kereq morá íwíáhue mé sansa íre miraowe.

18 Manikánsabe íre áhreowe ire. *(Buk Song 36.1;
Aisaia 59.7-8)*

19 Mósísine ehwehme ite Asiu kegá moke
sehgigeheéna Manikánka mi ehwéh iuwe.
Iuwaqme íre sehgoráhúne. Minayabe ite
tábuosoqme sehgjune íre irarerahúne. Ite
tagarionawe Manikánka itereq mah kehiná
kéhínánseqne ahbabáqsabe ehweh aitanawire.

20 Mósísine ehweh anteruonayabé Manikánka,
Ite kaweqtaq míáhwe íre aitankéhe. Minayabe
wehukenínká, Íné Manikáne ehweh aiq tábuosoqme
sehgíúge irarerahiro? Ahqáho. Írakaumo. Moke
mah kehiná kéhínánká mi ehwéh anteruona puaq
ite ahbabáq animárí múne tagarawéq mi ehwéh íre
irarerahúne.

Sísa Karáhénsabe aiq pútare atéh ánímé peh kaweqtaq míéh áníne i ehwéhne.

21 Manikánka Mósísine ehweh sehgíó kékabé,
Ite aiq kaweqtaq míáhwe teriro? Írakaumo. We
mó sansánire. Amahnága mi sansá ábóraragirana
wega itensabé, Aiq kaweqtaq míáhwe irarerahire.
Mi sansánsábé Mósísireq Manikáne ehweh iraru
kereqka aiq iraruwe.

22 Mi sansámé mahraréna, Manikánka moke
Sísansabé aiq pútare atáh ké kaweraritená aiq

kaweqtaq míáhwe arítéhre. Asiu kené mó ah, nahnso kené mó ah írakaumo. Manikánka Asiu kereq nahnso kereqsabé peh morá íwíahéna peh aiq pútare atáh kékabé kaweraritena kaweqtaq míáhwe ire.

23 Ite moke mah kehiná kékínánká ahbabárurauna puaq Manikánka kaweqtaq míá mía inserah ite kaweqtaq íre míá míaorahúne.

24 Sís Karahéga itene ahbabáq paiqmaro púana Manikánka séhréh aitena wáh insahwé aitena itensabé, Ite kaweqtaq míáhwe aitéhre.

25 Naho naho Sís íre tutaq Manikánka ahbabáq ke síwénunéna mi tanáhráq íre apubúue kamah ariewe. Wega wenahni eqmarowana Sís pukútaq wene korahqtaté wehukene ahbabáqsabe paiqmarowe. Minayabe Manikánka Sísansabé aiq pútare atáh kékawerarítéhre. Mina ireq Maniká anotah kawéq áníne íwíahúne.

26 Manikánka miraúnsabe amahnága itega, Maniká tábúsoréh áníne tagarione. Wega moke Sísansabé aiq pútare atáh kékawerarítéhre.

27 Minayabe iteitensabé iwíah íwíahonehnkono? Írakaumo. Iteitega Mósísine ehweh tábúsoqme miraúnayabé Manikánka itensabé, Ite kaweqtaq míáhwe aitehro? Írakaumo. Peh morá Sísansabé aiq pútare atona puana itensabé, Ite kaweqtaq míáhwe aitéhre.

28 Manikánka Mósísine ehweh tábúsoqme sehgi ánínsabé, Are kaweqtaq míahne atehro? Írakaumo. Ite tagarionawe peh wenahninsabé aiq pútare atéh ánínsabé, Are kaweqtaq míahne atéhre.

29 Manikámé peh morá ite Asiu kené Manikápo? Írakaumo. We moke ite Asiu kereq nahnsó kereqne Maniká míre.

30 Maniká peh morá ánínéna ite Asiu kereq nahnsó kereqsabé peh morá íwíáhire. Ite Asiu kereq nahnsó kereqka wensabé aiq pútare atonayabé Manikánka itensabé, Ite kaweqtaq míáhwe aitéhre.

31 Minayabe Mósísine ehwehnsabé abehq éhwéh míre éq anetaníbo enehnkono? Ahqáho. Írakaumo. Manikáne ahninkáwánsabé aiq pútare atona puaq Mósísine ehweh kaweq ehwéhne págegeue irarúne.

4

Manikánka Ébáráhma kaweqtaq míéh áníne ú ehwehne.

1 Ébáráhmawe ite Asiu kené igaqna míowe. Wensabé aneq iwíáhonehnkono?

2 Ébáráhmaga kaweq arámbéhríúnsabe Manikánka, Are kaweqtaq míahne atoo? Írakaumo. Wene arambehriyabé Ébáráhma kaweqtaq míahne atotaq tahirímé wewensabé iwíáh íwíáhú irino. Íre wega arambehriúnsabe peh morá Manikánka miraúnsabe Ébáráhmaga wewensabé íre iwíáh íwíáhorahúwe.

3 Manikáne ehwehnka mahraréna,
Manikánka teawu ehwehnsabé Ébáráhmaga aiq pútare atonsabe Manikánka wensabé, Are kaweqtaq míahne atowe ire. *(Stat 15.6; Jeremaia 2.23)*

⁴ Arambehri anínká ápeq pehipi íre meyéhre. Wega arambehrii puana wene wahnahnka ápeq áwíre.

⁵ Wehukenínká wewene arambehriyabé íre iwíah íwíahia peh ahbabáq ke kaweraritahráhi anínsábé aiq pútare atéhrana Manikánka mi anínsábé, Are kaweqtaq míahne atéhre.

⁶ Manikánka, Ite kaweqtaq míahwe arito keyabé Tébítiga naho naho iraréna iwíah íwíahúwe. Íre sene kaweq arámbéhríyabé kaweraritowana iwíah íwíahúwe.

⁷ Minayabe Tébítiga Manikáne púkuipéq naho aiq sehiranue mahraréna,

Manikánka sene ahbabáq kaqsuena kawerarítéh kewé

sirupipeq eyoyói ke méra iwíah íwíahowe.

⁸ Itene Wahnahnka sene ahbabáqsabe íre ehweh arítéh kewé sirupipeq eyoyói ke méra iwíah íwíahowe úwe. (*Buk Song 32.1-2*)

⁹ Manikánka kawerarítéhrara sirupipeq eyoyói kewe peh morá síú amurúruáh Ásiú kébo? Ahqáho. Íre sebatare. Manikánka síú íre amurúruó nahnsó kéreq moq kawerarítéhrara sirupipeq eyoyóire. Ébáráhmaga Manikánsabe aiq pútare atonsabe Manikánka wensabé, Are kaweqtaq míahne atowe teiewóge.

¹⁰ Ébáráhmane áú íre amurúruotaq kaweqtaq míahne atoo? Wene áú amurúruotaq kaweqtaq míahne atoo? Árahtaq kaweqtaq míahne atoo? Wene áú íre amurúruotaq kaweqtaq míahne atowe.

¹¹ Wene áú íre amurúruotaq Ébáráhmaga Manikáne ehwehnsabé aiq pútare ato púana

wensabé, Are kaweqtaq míahne atowe. Kaweqtaq míahne atonsabe mó ke sokigi arinkeheéna anehe Manikánka Ébáráhmansabé, Áú amurúruo atowe. Minayabe Ébáráhmaga Manikánsabe téh aiq pútare ato púana síú íre amurúrusa peh moke aiq pútare atáh kéné sinahbúwá úkirana Manikánka sensabé, Ite kaweqtaq míahwe arítéhre.

12 Asiu kegá pehipi síú amurúrúáhmé Ébáráhmawe sinahbúwábo? Írakaumo. Ébáráhmañé áú íre amurúrúótaq wega Manikáne ehwehnsabé aiq pútare atowe. Aiq pútare atowara wega aiq pútare atáhnserahno kewé Ébáráhmawe sinahbúwá míéhre.

Manikáne ehwehnsabé aiq pútare atéh éhwéhne.

13 Manikánka Ébáráhmareq wene anah-waréhreqsabé, Mókakewe itega mah marákó márákó awaq miagéhe teriuwe. Segá Mósísine ehweh kawerue sehgiúnsabe teriuwo? Írakaumo. Segá Manikáne ehwehnsabé aiq pútare ató púana wega sensabé, Ite kaweqtaq míahwe aritena awaq miagéhe teriuwe.

14 Peh Mósísine ehweh kawerue sehgió kégá awaq míáhtáq tahirímé Manikáne ehwehnsabé aiq pútare atáh ké íre awaq míówana Manikánka mirainauge ú ehwehmé abehrúki irino.

15 Manikánka Mósísine ehweh anterúáh ké kamah arinkéhe. Nahnso kegá Mósísine ehweh sene siahrerate íre írátiáhwe. Minayabe itega mi keyabé íre ehweh aritahráhúne.

16 Manikánka Ébáráhmareq moke wene anah-waréhreqsabé iwíáheña, Séhréh ariteyabe níre éna ínega mirainauge úwe. Mirainauge ú púana

wensabé aiq pútare atáh ké kaweraritankéhe. Manikánka peh morá Mósísine ehweh sehgó ké kaweraritankéhbo? Írakaumo. Ébáráhmaga wensabé aiq pútare atonserahno kereq moq kaweraritankéhe. Ébáráhmawe ite Manikánsabe aiq pútare atona kené iteinahbúe.

¹⁷ Minayabe Manikáne ehwehnka aiq mahraréna,

Ínéga miraunka arewe áhnte nahnsó náhnsóné sigaqna míankehe ire. (*Stat 17.5; Aisaia 48.13*)

Ébáráhmaga wensabé aiq pútare atotaq Manikánka tagéna wensabé aiq pútare atáh kéné sigaqna míankehe atowe. Ébáráhmaga aiq pútare ato anímé we Manikánéna pusa ké organúq sitena íre kék náneq ábóraq kahno atéhrana ábóraragire.

Ébáráhmaga Manikánsabe kawerue aiq pútare ato ehwéhne.

¹⁸ Manikánka wensabé, Arewe áhnte nahnsó náhnsóné sigaqna míankehe úwana Ébáráhmaga aiq pútare atena áwénunúwe. Manikánka, Arenanahréh áhnte míagehe atonsabe Ébáráhmaga mi ehwéhnsábé aiq pútare atena áwénu aruqarurúwe.

¹⁹ Aiq pútare atena áwénu aruqaruréna peh íregáritaq ópéq 100 opéq míonsabe naho korééna wene anonka taropagúwe. Wene ahre Sárahwe orení úkúnsabe wega ani íre maqmiahrahúwe. Minawé Ébáráhmaga tagéna, Manikánka tení éhwéh péhe éhwéhpómo íre iwíáhúwe. Írakaumo. Mira íwíáh íre iwíáhia peh aiq pútaq aginawire éna áwénunúwe.

20 Áwénunéna árahinabomo íwíáh íre iwíáhia peh teawu ehwéhnsábé aiq pútare ato puana págegeue ambubu atawéna Manikánsabe iwíáh íwíáh atowe.

21 Iwiáh íwíáh atena, Manikánka moke miraorahi aní púana wega teniátái ehwéh aiq pútaraginawire íwíáhéra áwénunúwe.

22 Ébáráhmaga Manikáne ehwehnsabé aiq pútare atonsabe Manikánka wensabé, Are kaweqtaq míahne atowe.

23 Manikánka wensabé, Are kaweqtaq míahne ato ehwéhmé íre peh morá Ébáráhmansabé sehi- ranúwe. Írakaumo.

24 Itensabéákáq teíre. Sísa itene Wahnah pukuwana Manikánka we iriwe organúq atowe. Itega organúq ato anínsábé aiq pútare atáhnaraq wega itensabé, Kaweqtaq míahwe aitankéhe.

25 Segá Sísa subiq suaneherautaq Manikánka mi ke íre saiqnaritowara subiq súówana itene ahbabáqsabe putiowe. Ite kaweraitankeheéna Manikánka we iriwe organúq atowe.

5

Manikánka itensabé, Ite kaweqtaq míah ké wóe ú ehwéhne.

1 Sísansabé aiq pútare ataráúna puana Manikánka kaweraitena, Kaweqtaq míahwe aitáráire. Wega kaweraitaráinsabé ite insahwé aitená irunukiq ita itaire. Itene Wahnah Sísa Karáhénzabe mirau- rainka Manikánka irunikiq ita itaire.

2 Sísansabé aiq pútare ataráúna puana Manikánka itensabé, Ínéba sero éna séhréh aita aitaire. Séhréh aitéhraq Manikánka kaweqtaq mía míainserah itega

mókake weba méq we tahnsánue kaweqtaq mía míaoneheqmúne íwíáhúnayabé itene iru eyoyóire.

³ Íre peh morá minayabe iru eyoyóire. Íre kaweragi tanáhráq ebeqme itene iru umeh agire. Mi tanáhráq iwíáhqué, Sísane sánsá íre sueq peh ambubu atione íwíáhúne. Mira íwíáhúnayabé itene iru eyoyóire.

⁴ Manikáne sansá ambubu atíáhnaga ahbabáqsabe ahqáho atahráhúne. Ahqáho atáhnaraq wega séhréh aitanawire íwíáhqué wega ite kaweraitanawire éq áwénunúne.

⁵ Áwénunúnaraq íre pehipi áwénunúne. Írakaumo. Manikánka Wenawa iteba eqmaq áuwátáiraq ite mó keyábé irutaboirigeheéna wenawanka séhréh arite sansa sokigi aíraq ite íre pehipi áwénunúne.

⁶ Ite ahbabáq aruqaruréq kaweqtaq íre míahrahúnana awehraq tanáhráq Sísá Karáhéga ite meirena kaweraitanieéna putiowe.

⁷ Tábúsoréh ání séhréh atanieéna mó anínká pukinabo? Írakaumo, Minawé íre wehukene sánsáne. Anotah kawéq ání séhréh atanieéna mó anínká pukinabomo.

⁸ Ite ahbabáq animári míaraunaraq Sísá Karáhéga ite kaweraitanieéna putiowe. Miraú púana Manikánka itensabé anotahtaq arutaboirire ue aiq sokigi aíre.

⁹ Sísá Karáhé putiotaq wene korahq tunsabe Manikánka itensabé, Kaweqlaq míáhwe aitéhre. Kaweqlaq míáhwe aitená ite anotah sehréh aita aitaéna mókake mó ke ehweh aríténa ite íre ehweh aitanawire.

¹⁰ Ite Manikáne naruo anímári míaraunaraq wenahni putionsabe Manikánka insahwé aitáráire.

Amahnága Sísa oga mía míai anínká ite insahwé aitárái kebá ména séhréh aita aitaire.

¹¹ Minawé aiq pútaq ehwéhnsábé iwíáh íwíáhúne. Maniká Iteribonsabé moq iwíáh íwíáhúne. Itene Wahnah Sísa Karáhéga insahwé aitéhnsábé Maniká Iteribonsabé anotah iwíáh íwíáhúne.

Éhrámaga miraúnka puké sansa áhwárówana Sísaga miraúnka oga mé sansa áhwáró ehwehne.

¹² Itega tagarionawe naho naho mah marákó márákó ahbabáq íre kotaq peh morá áninká ahbabáq áhwárówe. Wega ahbabárúnka puké sansa áhwárówe. Moke anehe piah ké moq ahbabáruronsabé puku pukuowe.

¹³ Mósísiga sehgióro ú ehweh íre irarútaq mah marákó márákóípéqté kégá ahbabárowe. Sehgíoro ú ehweh íre irarú púana Manikánka mó aníné ahbabáq mó aníné ahbabárue íre iwíáhúwe.

¹⁴ Ahbabáq íre iwíáhúwara Éhrámareq wene animárínseq puku pukuwe. Mósisi mío tanahráqkákáq pukuwe. Éhrámaga Manikánka pehragáhno ú ehweh anteruwara anehe piah kégá moq ahbabáréra pukuwe.

Éhrámawe anehe sú aníné píkisah tahnsáne.

¹⁵ Éhráma peh morá ání ména o sansa áhwárówana we anehe sú anímé peh morá áninká moq o sansa áhwárówana íre monseráh sánsátáré wíre. Ahqáho. Írakaumo. Sísane sánsánká Éhrámane sánsá kiotaikire. Éhrámaga ahbabárünsabe wereq moke mó kereq puku pukuwe. Sísa Karáhéga áhnte ke séhréh aitanieéna itene ahbabáqsabe

putiowe. Putionsabe Manikánka itensabé arutaboiréna séhréh aitena organúq ítéhre.

16 Oganúq ítéh sánsámé Éhrámaga ahbabáru sansámé íre peh morá sánsáne. Ahqáho. Írakaumo. Oganúq ítéh sánsánká ite kaweraitehrana Éhrámaga ahbabárú sansanká ite anotahtaq íre kaweraitéhre. Éhrámaga peh morá ání ména ahbabárúnsabe Manikánka ite ómi kamah aiuwaq pukorahúne. Áhnte ahbabárowana Manikánka o sansanue organúq itena itensabé, Kaweqtaq míáhwe aítéhre.

17 Peh morá ánínká ahbabárúnsabe ahbabáqka áhnte wehuké saiqnariéhrara puku pukuowe. Puku pukuowana organúq ítéh sánsánká Éhrámaga ahbabárú sansa kiotaikire. Sísa Karahéwé peh morá ánínká miraúnka Manikánka íné eqmaq núwátairana iteba míraautaq págege arámbéhríena ótaq sansá, itega íre tagariaro sansánurautaq pehwehrue míraugaq tagarowe. Itega mina tagéq ahtebahme Manikánka íné eqmaq núwátái ání ména wene arambehri tábúsoqme mira aruqaruruge.

18 Kawerue íratíáhro. Éhrámaga ahbabárúnsabe moke ahbabáronsabé Manikánka ómi mah kehiná kéhíná ehweh aritahráhire. Sísa Karahéga kaweq sansánúnka Manikánka ómi mah kehiná kéhínánsábé, Kaweqtaq míáhwe aitena organúq itahráhire.

19 Éhráma peh morá ání ména wega Manikáne ehweh anteruonsabe áhnte wehuké ahbabáq ke úkowe. Sísaga peh morá ání ména Wenabone

ehweh tábúsoqme sehgiunsabe áhnte wehuké kaweraito púaq kaweqtaq mía míorahúne.

20 Wehukega ahbabáq áhnte kéhre siahtebageheéna Manikánka sehgíoro ú ehweh náriuwe. Ahbabáq áhnte agúwana Manikánka séhréh aitéh sánsánká ahbabáq sansa kiotaikire.

21 Ahbabáqka wehuke saiqnariéhrara puku pukuowe. Itene Wahnah Sísa Karáhéga miraúnsabe Manikánka itensabé, Kaweqtaq míahwe aitená organúq itena áhntetaq séhréh aitená itensabé, Oga mía míoro aitéhre.

6

Sísa pukútaq ite moq pukowana ehwéhne.

1 Minayabe aneq iwíáhonehnkono? Mahra iwíáhonehnkono? Manikánka ite áhntetaq peh íregáritaq séhréh aitankéhboq ahbabáq aruqaruroneheqmúne iwíáhonehnkono?

2 Ahqáho. Írakaumo. Pusa ké ahbabáq sansa súáhnserah ite moq pusa ké tahnsa méq ahbabáq suone. Minayabe árahue ahbabáq aruqaruronehnkono?

3 Ite pusa ké tahnsa úkuna tanáhráq íre ahtebaho? Ite wání meraunaraq itereq Sísa Karáhéreq morá ání tahnsa úkuraunana we pukútaq ite moq pukowane.

4 Ite wání meraunawe itereq Sísa Karáhéreq pukuraune. Pukuraunara we maisarótaq itenkakáq maisarówe. Maniká Iteribo págege aní ména Sísa Karáhé iriwe organúq atotaq itenkakáq iriwe organúq itowe. Ite o sansanigeheéna iriwe organúq itowe.

Ite Sísareq oga mía míaúne i ehwéhne.

⁵ Sísa Karáhé pukúwaq ite moráráq pukéq wereq itereq morá ání tahnsa úkowane. Mina únserah Manikánka Sísa iriwe organúq atotaq itereq moráráq iriwe organúq itowaq wereq itereq morá ání tahnsa mía míaúne.

⁶ Ite tagarionawe Manikánka itene irupipeqté áhbábáq íwíáh awankátaq táhparowe. Itene ahbabáq iwiáh parabaruanieéna Sísa awankátaq táhparótaq Manikánka itene ahbabáqkakaq mitaq táhparowe. Minayabe amahnága ahbabáqka ite íre saiqnariahrahire.

⁷ Itene ahbabáqka árahinsabé ite íre saiqnariahrahiro? Ahbabáqka pusa ké íre saiqnariahrahire. Ite pusa ké tahnsa úkúna puana íre saiqnariahrahire.

⁸ Sísa Karáhé pukútaq itereq pukowanayabé itereq wereq moráráq mía míaoneheqmúne. Mina aiq pútaq ehwéhne íwíáhúne.

⁹ Ite írátiónawe Sísa Karáhé mó íre pukinae. We pukúwana iriwe organúq ato púana we mó íre pukinae. Mó íre pukorahi puana peh oga mía míainawire.

¹⁰ We peh morá tánáhráq pukú púana mó íre pukinae. Pukúnka ahbabáq sansa aiq saiqnariehre. Amahnága we oga mía míaime Maniká awahbeh sansá miraire.

¹¹ Mina inserahnoro. Itene naho áhbábáq sánsá aiq suto puaq mó íre ahbabáronehe íwíáhoro. Itereq Sísa Karáhéreq moráráq oga méq Maniká awahbeh sansá miraoneheqmúne íwíáhoro.

¹² Ahbabáqka itene pukorahi inónká saiqnariehnehboq ahbabáq apubúue súáhro.

Itene irupipeqté íwíáhgá ite áúgi ínehboq ahbabáq iwiáh apubúue súáhro.

¹³ Itega irutaboiro naneq meyaneheéq itene aiayahnka ahbabáriyeho. Ahbabáriyehboq ite mó anínká mó anínkáue Manikánsabe, Néne ninonka are áwúge. Wahnahnainto teawéro. Itega pusa ké tahnsa míarotaq Manikánka organúq ítárái puaq wensabé áhrabéq, Arene kaweq sansá miraonehemqmúne teawéro.

¹⁴ Manikánka séhréh aitéh púana Mósísiga sehgíoro ú ehwehnká íre ehweh aitéhre. Minayabe ahbabáqka ite íre saiqnariéhre.

Sehgíra sansánká ite saiqnarawé ehwehne.

¹⁵ Minayabe aneq iwíáhonehnkono? Manikánka séhréh aitéhraq Mósísine ehwehnka íre ehweh aitéhnsábé ahbabáq aruqaruronehnkono? Írakaumo.

¹⁶ Sehgíra sansánká saiqnariéhmé íre iahtebaho? Ite ahbabáq aruqarurirataq ahbabáqka saiqnariahnaraq pukoneheqmóe. Ite Manikáne sansá sehgírataq kaweq sansánká ite saiqnariahnaraq kaweqtaq mía míaoneheqmóe.

¹⁷ Menah itega ahbabáq aruqarururotaq ahbabáqka ite saiqnariaraire. Saiqnariaraitaq mó kegá aíq pútaq ewhéh íwáhnoruowaq ireq iwíáh íwíáhéq sehgírowana ahbabáqka saiqnariaraime Manikánka sabi iuwátáire. Minayabe Manikánsabe iwíáh iwíáh atone.

¹⁸ Kaweq sansánká ite saiqnariéhnsábé iwíáh iwíáh atone.

¹⁹ Íre irasa ké míéhboq kawerue irageheéna pahsuqme teiúge. Menah itega ahbabáqsabe

irutaboiréq mira aruqaruronserah amahnága peh kaweq sansánsábé irutaboiréq kaweqtaq míáhro.

²⁰ Ahbabáqka ite saiqnariaraitaq itega kaweqtaq íre míahrahuowe.

²¹ Itega ahbabáruro sansánsábé amahnága iye-hitehre. Itega ahbabárurotaqmé kaweq apéq meroo? Írakaumo. Mina onserahno kewé pukoneherawoe.

²² Ahbabáqka ite saiqnariarairana Manikánka sabirutairaç wene arambehri anímári úkurowe. Minayabe ite kaweqtaq méyabe iwíáh iwíáhqué ogá méraperq mía míaoneheqmóe.

²³ Ahbabáqka saiqnariéhnká aneq apéq wehuke siro? Ahbabáqka saiqnariéh ké pukoneherawoe. Itene Wahnah Sísa Karáhénsabe aiq pútare atona kewé Manikánka wáh kaweraitena organúq itena, Sísareq ahriahri mía míaoro aitéhre.

7

Oganúq itonsabe kaweq sansánonehe i ehwéhne.

¹ Néne iyahnabo anímáriño, itega Mósísiga mi-raoro ú ehwéh aiq ahtebahwe. Wehukene ogá mé tanahráq mah ehwéhmé anterúéhrataq mi ehwéhnká ehwéh aritahráhire. Se pukirataq mi ehwéhnká se íre ehwéh aritahráhire. Minawé aiq írátiáh mino.

² Mi ehwéhnká, Arenawehqpa mía míauño únsabe wenawehq ogá míéh tánáhráq áuwéh áhréwé mi ehwéh aiq anterúéhre. Wenawehq aiq pukirana mó weh kéréhmé mi ehwéh íre anterúéhre. We puki puana mi ehwéh íre anterúéhre.

3 Wenawehq ogá míéhtáq mó weh kéréhrana mi ehwéhká, Are ahbabáq ini móne atéhre. Wenawehq pukínaraqmé we mó weh kérahráhire. Wenawehq puki puana mó wehkinsabé mi ehwéhká, Are ahbabáq ini móne íre atahráhire.

4 Néne iyahnabo anímáríno, ite mi iní tahnса móe. Sísа Karáhе pukútaq ite moq pukunsabé Mósísine ehwehnka amahnága íre ehweh aitéhre. Manikánka wenahni iriwe organúq atowaq Sísane animárí ukéq wene arambehri miraoneheqmúne.

5 Iteitene ahbabáq iwiáhgá saiqnariarai puaq Mósísine ehweh ireq mi ehwéhnsábé iuwahriehre éq pukorahúna ahbabáq aruqarurúne.

6 Sísareq moraráq pukowanayabé ite saiqnariarai naneq soraq iuwena Mósísine ehweh moq soraq sueq amahnága Manikáne Awanka sokigi aí ó sánsánúne. Íre Mósísiga sehgóro ú sansa peh Manikáne Awanka sokigi aí ó sánsá sehgioneheqmúne.

Ahbabáq sansanká ite ahbabáraitehre i ehwéhne.

7 Ite ahbabáronaraqmé aneq iwíáhonehnkono? Mósísine ehwehme ahbabáq ehwehne iwíáhonehnkono? Írakaumo. Peh morá mi ehwéh írátáunsabé ahbabáq ani múge iwíáhurauge. Mi sehiránká mahraréna, Mó aníné ménsámhnsánsabe aigará pabekíneho ire. Mi ehwéh írátáunsabé íné tagaríómé mó aníné ménsámhnsánsabe nigará pabekime ahbabáq míre.

8 Mi ehwéh irena íre sehgoráhuraunsabé ahbabáqka íné saiqnariarairana áhnte íre kaweq

sansá néne nirupipeq áhwararaire. Mósísine ehweh íre kéhtáq tahirí ahbabáq árahue ahtebóna iripo?

⁹ Mósísine ehweh íre írátautaq, Íné kawequeq aní mûge íwíáhurauge. Anehe mi ehwéh kawerue irena, Ahqáho. Íné ahbabáq ani

¹⁰ púana pukorahuge íwíáhurauge. Wehukega oga míageheéna Mósísiga mi ehwéh irarúwe. Mi ehwéh irena, Íné íre oga míahrahuge éna peh pukorahuge íwíáhurauge.

¹¹ Mi ehwéh irena íre sehgoráhuraunsabé ahbabáqka péhe sánsá aintena saiqnariarairana, Íné pukorahuge íwíáhurauge.

¹² Minayabe anere enehnkono? Manikánka iwíáh atowana Mósísiga irarú ehwéhmé Manikáne ehwehnéna tábusoréh éhwéhnéna kawequeq ehwéh míre.

¹³ Mi kawéq éhwéhnká íné íre kaweraintaráiro? Irakaumo. Mi ehwéh írátáugana ahbabáqka saiqnarawéna íre kaweraitaráire. Íné áhnte ahbabáq ání ména pukorahuge íwíáhinkeheéna mi ehwéhnká sokigi aníatáire.

Ahbabáqka ite saiqnariéh éhwéhne.

¹⁴ Ite írátionawe Manikánka iwíáh atowana Mósísiga mi ehwéh irarúwe. Minayabe mi ehwéh kawequeq ehwéhnirana ahbabáqka íné saiqnariéhrana Maniká awahbeh sansá íre sehgoráhéra peh ahbabáq aruqaruruge.

¹⁵ Íné nuwahbeh kawéq sánsá mirainie íwíáhumé íre mira aruqaruruge. Peh íre nuwahbeh ahbabáq sánsá mira aruqaruruge. Aneqsabé mira aruqarurugo? Minawé íre niahteboge.

16 Íné nuwahrieh ahbábáq sánsá mira aruqarurugana Mósísine ehwehnka néne ahbabáq sokigi anírana mi ehwéhmé peh kaweq ehwéhne íwíáhuge.

17 Minayabe íre ínénéga peh nirupipeqté áhbábáq íwíáhgá saiqnariéhnká ahbabáq aruqaruruge.

18 Kaweq sansá mirainauge uganawe íre miraorahuge. Íre miraorahunsabé íné tagariómé nirupipeq kaweq iwíáh íre kéhre.

19 Íné nuwahbeh kawéq sánsá mirainie íwíáhume íre mira aruqaruruge. Peh nuwahrieh ahbábáq sánsá mira aruqaruruge.

20 Íné nuwahrieh ahbábáq sánsá mira aruqarurunsabé íre ínénéga peh nirupipeqté áhbábáq íwíáhgá saiqnariéhnká ahbabáq aruqarúrige.

21 Íné mahraue tagaríóge. Íné nuwahbeh kawéq sánsánsábé iwíáhutaq ahbabáqka saiqnariéhnsábé íre miraorahuge.

22 Manikáne sansá peh kaweq sansáne íwíáheña mi sansánsábé iwíáh íwíáhuge.

23 Mirainauge íwíáhugana nirupipeq mó iwíáh kéhre. Ahbabáq iwiáhgá kaweq iwíáh kiotaiki puana ninonka nirutaboiru ahbabáqká saiqnariéhrana ahbabáq aruqaruruge.

24 Íné ahbabáq ani mío púana nirupipeq áhnte umehire. Insegá séhréh aintena sabi nuwankéhbo?

25 Ahbabáqka saiqnariéhnsábé pukorahuge. Manikáne sansá sehgieyabe nírana peh nirutaboiru iwíáhgá saiqnariéhrana ahbabáruge. Minayabe insegá séhréh aintena sabi nuwankéhbo uge. Sísa Karáhé itene Wahnahnká miraúnka

Manikánka séhréh aintena sabi nuwahráhire.
Minayabe wensabé iwíáh íwíáh atóge.

8

*Sísa Karáhéga itene ahbabáq kaqiuwena
Manikáne Awa iteba eqmaro ehwehne.*

¹ Sehgíoro ú ehwehnká Sísa Karáhéreq mía míaúna ke íre ehweh aitéhre.

² Aneqsabé íre ehweh aitehro? Ahbabáqka ite saiqnariéhnsábé pukorahúnaraq Manikáne Awanka organúq itena sabi íuwéhre. Sabi íuwéhrana Sísa Karáhéreq mía míaúnayabé íre ehweh aitéhre.

³ Mósísiga sehgíoro ú ehwehnká itene ahbabáq íre kaqiuwahráhire. Árahinsabébo? Itega mi ewhéh íre sehgoráhhúne. Minayabe mi ewhéhnká íre kaweraitahráhire. Íre kaweraitahráhinsabé Manikánka webataq wewega itene irupipeqté áhbábáq íwíáh kaqiuwankeheéna wenahni eqmarowe. Eqmarowana ite tahnsá wéhükéní úkéna itene ahbabáqsabe putiowe.

Itene ahbabáqsabe putiotaq Manikánka mi ahbabáq kaqsuonsabe amahnága itene ahbabáq iwiáhgá ite íre saiqnariahrahire.

⁴ Íre iteite iuwahbeh ahbabáq iwiáh peh Manikáne Awanka iwiáh aitehraq we awahbeh iwiáh miraonsabé kaweq sansá Mósísine ehwehnka irari sansá mira aruqarurúne.

⁵ Sene sirupipeqté áhbábáq íwíáh mirao kegá ahbabáq sansansábé iwiáh íwíáhowe. Manikáne Awanka iwiáh arítéh árámbéhrí mirao kegá wene sánsánsábé iwiáh íwíáhowe.

⁶ Sene sirupipeqté áhbábáq sánsánsábé iwiáh íwíáho kegá pukoneherawoe. Manikáne Awanka

awahbeh sansánsábé iwíáh iwíáh atáh kégá oga mía míaowana sirunukiq sítéhre.

⁷ Sene sirupipeqté áhbábáqsábé suwahbeh kegá Manikáne ehweh íre sehgira peh anteruera Manikáne naruó míáhwé.

⁸ Sene sirupipeqté áhbábáq iwíáh sehgió kégá Maniká awahbeh sansá íre sehgoráhowe.

⁹ Manikáne Awanka itene irupipeq mía míairaq itene irupipeqté áhbábáq iwíáh íre miraia peh Manikáne Awanka iwíáh aitéh iwíáh miraowe. Sísa Karáhéne Awanka wene arupipeq íre mía míai anímé we íre Sísa Karáhéne ani míre.

¹⁰ Itega ahbabáruronsabé itene inonka pukorahi naneq mire. Sísa Karáhéga itene irupipeq míéhraq kaweqtaq míahrahéq iteyuwame oga mía míaowe.

¹¹ Manikáne Awanka itene irupipeq mía míainaraq wega Sísa Karáhé iriwe organúq atonserah itene pukorahi inónká moq mókake iriwe organúq itankéhe. Manikáne Awanka itene irupipeq mía míai puana mirainawire.

Manikáne Awanka séhréh aitéhraq ite Manikáne animári úkorahúna ehwéhne.

¹² Minayabe ite anotah arámbéhrí kékre. Mi arámbéhríwé íre itene irupipeqté áhbábáq sásá miraé arámbéhrí wíre. Ahqáho. Írakaumo. Néne iyahnabo anímáriño,

¹³ itene irupipeqté áhbábáq iwíáh mirairataqmé pukoneheqmóe. Manikáne Awanka séhréh aitéhnsábé itene irupipeqté áhbábáq iwíáh kaqsueq íre mirairataq oga mía míoneheqmóe.

¹⁴ Manikáne Awanka iwíáh aritéh iwíáh sehgió kékre Manikáne animáriñe.

15 Manikánka Wenawa iteba eqmarowana Wenawanka ite saiqnarawéna áhre aitanabo? Írakaumo. Wene animári míagehééna eqmarowana Wenawanka ite págege aítéh púaq ite Manikánsabe, Iteriboe atone.

16 Manikáne Awanka itene irupipeq ména, Néne animári móe tei teininsabé ite tagarionawe ite Manikáne animári múne.

17 Ite Manikáne animári míona puaq ite mókake wega ina naneq kaweq naneq awaq mianehemqmúne. Sísa Karáhé, iteruwahga aiq awaq mionserah itega mókake moke kaweq naneq awaq mianehemqmúne. Sega Sísa áwíoqnonserah ite moq íwíoqnagehe. Íwíoqnehrataq Sísane sánsá kawerue sehgiónaraq mókake we tahnsá méq wereq mía míaoneheqmúne.

Kaweqtapéq awaq me ehwéhne.

18 Mah marákóipéq míona tanáhráq íérinka irupipeq umehire. Mókake téhrehrabeq míahnaraq áhnte kawéqtápéq púana irupipeq anotah eyóyóinae. Anotah eyóyói naneqka umehi naneq kiotaikína puana umehinsabé anetaníbo íwíahéq kaweqtapéqsábé áwénunonehe.

19 Ite Manikáne animári púana wega mibeqté kaweraitahna sansá sokigi ainaraq ahrebanehe. Mi tanáhráq sínaraqsábé moke Manikánka miraú naneqka arutaboiréna áwénunire.

20 Téhwe moke miraú naneq anotah kawerarowana anehe abehrúkúwe. Íre wewega abehrúkúwe. Írakaumo. Peh Manikánka abehrúkúno atowana mira agúwe. (*Stat 3.17-19*)

Amahnága mi naneqka Manikánka kawerarahna tanáhráqsábé áwénunire.

21 Mókakewe moke miraú naneq mó íre kárékinae. Manikánka omasa tánáhráq moke mi naneq kawerarankéhe. Ahbabáqka ite wene animári íre saiqnariahrah inserah kareki sansánká moke miraú naneq íre saiqnariahrahire.

22 Ahre inínká ani maqmianaitaq érinsabé uwo uwoire. Ite tagarionawe uwo uwoinserah moke miraú naneqka naho naho uwo uwoéna amahnágaákáq uwo uwoéna kaweq tanáhráq sínaraqsábé áwénunire.

23 Uwo uwoéna kaweq tanáhráq sínaraqsábé áwénuniraq ite wehukega moq uwo uwoéq áwénunúne. Manikánka Wenawa téh iteba eqmarowana iteba mía míáena séhréh aitéhre. Minayabe anehe wega itene inonkansabé, Kaweq inónká úkúno aitená néne animári móe aitanawire. Mi tanáhráqsábé arutaboiréq áwénunúne.

24 Manikánka ite kaweraitena organuq itáráirana amahnága inonka kaweraitahna tanáhráqsábé áwénunúne. Áwénunúna naneq tagónaraq tahirí íre áwénunúna irino. Aiq tageh anínká mó íre áwénunire. Wega aiq tageh puana aneqsabé mó áwénuninkehbo?

25 Itene iuranka íre tagóna naneqsabé áwénunúne. Manikánka aiq mirainawire íwíáhéq pehwehrue áwénunúne.

26 Íre págege ke míonana Manikáne Awanka séhréh aitéhre. Manikánsabe, Aneq ehwéh púrerue teawenéhkono únana Manikáne Awanka séhréh aitéhre. Wega itene irupipeq míéhraq itega íre ehwehnorahúna tanáhráq peh mukaq

mukaqsúnana ite séhréh aitanieéna wene iwíáh Maniká teawena iteitene umehi naneqsabé púreraitéhre.

²⁷ Manikánka itene irupipeqté íwíáh tagaríéhre. Wenawanka Maniká awahbeh sansá tagaríéh púana ite wene animárínsábé púreraitéhrana Manikánka wene púreq ehwéh íréhre.

²⁸ Wenahni tähnsá míageheéna Manikánka omaq itowaq wensabé irutaboirúne. Ite tagarionawe ite meirena kaweraitanieéna Manikánka moke kaweq tanáhráqkákáq moke íre kaweq tanáhráqkákáq séhréh aitéhre.

²⁹ Téhwe Manikánka ite tagariowe. Tagarawéna wenahni tähnsá míageheéna ite omaq itowe. Sísiteruwah ebeq kéna míowaq ite wenábáqmari míone.

³⁰ Manikánka ite omaq ito ke íáhrabéna itensabé, Kaweqtaq míáhwe aitéhre. Kaweqtaq míáhwe aitéhnsabé wega itensabé, Ínéba méq kaweqtaq mía míaunserah míagehe aitowe.

Manikánka itensabé ahriahri arutaboiraitéh éhwéhne.

³¹ Manikánka itensabé, Ínéba méq kawetaq mía míaunserah míagehe aitonsabe aneq iwiáhonehnkono? Wega ite íéhneh aitéhnsabé itene naruoga íre saiqnariahraho mino.

³² Manikánka wenahni íre saiqnatasa peh moke itene ahbabáqsabe pukinkeheéna eqmarowe. Wega íre saiqnato puana moke kaweq naneq náiena séhréh aitanawire.

³³ Wene animárí míageheéna Manikánka ite omaq ito púana insega ite ehweh aitankéhbo?

Írakaumo. Maniká wewega itensabé, Kaweqtaq míahwe aitéhre.

³⁴ Marikánka kaweraito púara inseréhga itene ahbabáqsabe ehweh aitera kamahigéhbo? Írakaumo. Sísa Karáhéga itene ahbabáqsabe putiowana iriwe organúq atowana wega amahnága Maniká Iteribone ayah púpeq ména itensabé púreraitéhre.

³⁵ Sísa Karáhéga itensabé arutaboiraitéhre. Íre kaweç tanáhráq sínawe, íeri tanáhráq sínawe, íwioqné tanáhráq sínawe, ehwehráhna tanáhráq sínawe, tabonah tanáhráq sínawe, pukorahúna tanáhráq sínawe, ite subiqme kamah áira tanáhráq sínawe Sísaga itensabé íre arutaboiria peh iuwankéhbo? Írakaumo. Moke mi tanáhráq moq arutaboiraitena iteba míainawire.

³⁶ Minayabe Manikáne ehwehnka mahraréna, Arene animárí míonayabé sega ahkakebopoq iubiç suaneherawoe. Wehukega sipisípiç subiq súáhnserah ite moq iubiç suanehe íwiáhowe ire *(Buk Song 44.22)*

³⁷ Moke teiyú tánáhráqsábé áhreonehnkono? Írakaumo. Sísaga itensabé mi tanáhráqkákáq arutaboiraitena íehnehi puaq itene naruo kiotaikorahúne.

³⁸ Mó kegá miraonsabé wega itensabé íre arutaboiria peh túbah aginabo? Írakaumo. Ite pukonaraqmé oga míonaraqmé Manikánka itensabé íre arutaboiria peh túbah aginabo? Írakaumo. Íopeqté kewé owainawamarímé anotah wahnáh kewé sega miraonsabé Manikánka itensabé íre arutaboiria peh túbah aginabo?

Írakaumo. Amahnága íre kaweq tanáhráq kéhnsábé mókake íre kaweq tanáhráq sínaraqsábé Manikánka itensabé íre arutaboria peh túbáh aginabo? Írakaumo.

³⁹ Sehwerapeqté náneq kéhnsábewé, maraipéqté náneq kéhnsábewé, Manikánka moke miraro naneq kéhnsábewé Manikánka itensabé íre arutaboria peh túbáh aginabo? Írakaumo. Itene Wahnah Sísa Karáhé kérónayabé Maniká Iteriboga íre túbáh agia peh ahriahri itensabé arutaboiraitanawire. Minawé aiq tagarióge.

9

Poraga Ísara keyábé arutaboirú ehwehne.

¹ Íné Sísa Karáhéne ani mío púana péhe éhwéh íre teiasa peh aiq pútariahnsanuge. Manikáne Awanka nirupipeq ména aiq pútaróne aintéhre.

² Nánuwahrah Isárá ké Sísa Karáhé íre tagariáhnsábé nirupipeq umeh agu aguire.

³ Nánuwahrah Isárá kégá Sísa kérera oga míáhtáq tahirímé íné iraipéq pokéyabe íre ahqáho u irino.

⁴ Ísara ke Manikáne animári míageheéna Manikánka naho omaq itowe. Omaq itowara igaqnaréhga Manikáne págege tehreh naneq tagowana wega omasa éhwéh teriuwe. Wega Mósísi iwíáh atowana sehgóro ú ehweh teriuwe. Manikánsabe iwíáh iwíáh ató sansa sokigi ariena mókake awinauge ú ehweh teriuwe.

⁵ Itene igaqnaréh anotah ke míowe. Sísa Karáhéga mah marákóípéq tutaq wenano Ísara iní míowe. Sísa Maniká ména moke miraú

naneqkakáq wahnahniraq wensabé ahriahri iwíáh atone. Aiq míre.

Manikánka Ísara kebá miraú sansansábé éhwéhne.

⁶ Naho naho Manikánka Ísara keyábé, Néne animári míageheéna omaq itóge úwe. Amahnága áhnte Ísara kegá Manikánsabe suwahriehre éra íre wene animári míáhwe. Minayabe Manikánka teriu ehweh abehq úkiro? Írakaumo. Manikánka Ísara kené sinahwaréh wene animári míageheéna ómi íre omaq sitowe.

⁷ Minayabe wega íre moke Ébáráhmane animári omaq sitowe. Peh morá wenahni Áhísáhkine animári Ísara kené sigaqnaréh míówe. Manikánka Ébáráhma naho teawena,

Arenahni Áhísáhkiwe itene igaqna míankehe úwe.
(Stat 21.12)

⁸ Mah ehwéh áwahewé íre Ébáráhmane ahrega maqmaro animárinká Manikáne animári úkowe. Írakaumo. Peh Manikáne ehwehsabé aiq pútare ata atao kegá Ébáráhma kahnáh kée ue síwírarítáhwe.

⁹ Mi ehwéhnúmé Manikánka Ébáráhmansabé naho mahraréna,

Mó opéq kouwekinaraq Sárah arene ahrega ani-mai maqmarankéhe úwe. *(Stat 18.10,14)*

¹⁰ Mó ehwéhnsábé iwíáhoro. Áhísáhkine ahre wenáwíq Árébékaga morágáké téhraníté maqmiowe. Sibowáwé peh morá itene igaqna Áhísáhkie.

11 Sinowagá maqmianaútaq sega kaweq sansánkákáq ahbabáq sansankákáq íre mirao-rahuye. Minayabe íre seyene arambehriyabé peh morá Maniká awahbeh iwíáhgá aiq pútaraginkeheéna omaq sitowe.

12 Mi tanáhráq Manikánka sinowansábé, Ebeq piah anínká anehe piah aní awahbeh arámbéhrí mirainkehe úwe. *(Stat 25.23)*

13 Minayabe Manikáne ehwehnka aiq mahraréna, Anehe piah aní Sékópansabé nirutaboiréna ebeq piah aní Ísonsabé nuwahriehre ire. *(Lo 21.15)*

14 Manikánka aiq irarúnsabe aneq iwíáhonehnkono? Wega íre tábúsoq sitéhre iwíáhonehnkono? Ahqáho. Mira iwíáh íre orahúne.

15 Manikánka Mósíssinsabé naho mahraréna, Ínénéga iwíáhu aní séhréh ataníe. Ínénéga niruní ánínsábé nirutaboirataníe úwe. *(Kisim Bek 33.19)*

16 Manikánka wehukení omaq atáhnsábé íre mi aníné iwíáh wíre. Íre wene arambehriga séhréh atéhrana peh Manikánka wehukenínsábé arutaboiréna séhréh atéhre.

17 Mósisi Ísípi marárórápéq míotaq Manikáne ehwehnka mibeqté wáhnáhnsábé mahraréna, Néne págege sansá sokigi arinieéna wahnahnúno atáráuge. Minayabe mah kehiná kékéhínánká néne págege sansá ahtebagehe ire. *(Kisim Bek 9.16)*

18 Minayabe Manikánka wehuke tagéna iwíáhéna mó keyábé arutaboiréna séhréh aritená mó keyábé, Saiyo anímári méq mitaq míáhro arítéhre.

19 Ite míáhrabeqte áninká ínénabe, Maniká wewe awahbeh iwíáh mirainsabé árahinsabé itene ahbabáqsabe ehweh aitehro kasenire. Kasenéna, We awahbeh iwíáh mirainsabé wehukeníká we awahbeh iwíáh íre miraorahi mino ire.

20 Itewe peh wehuke puaq Manikánsabe abehq éhwéh kaseniyeho. Kunubaga ehwehnitaq tahirímé miraréh áninsábé, Aneqsabé mahna tahnsa miraintahno iripo? Írakaumo.

21 Kunuba miraréh áninká peh morá áwánkátáté kawerue mirai kunúbáákáq íroke kunúbáákáq miraime ehweh atanabo? Írakaumo. Kunuba miraréh áninká wewene arambehri puana we awahbeh iwíáhue miraréhre.

22 Manikánka moq we awahbeh iwíáhue miraréhre. Wehukega wene págege sansá tagageheéna Manikánka kamah arie sansa sokigi arítéhre. Wega ahbabáq keyabé síwénunéna peh mótaq mótarue ehweh aritená anotahtaq kamah arinkéhe.

23 Wega wewe anotah anímé sansánkákáq wewe págegeue séhréh aite sansankákáq sokiginieéna ite wene animárí arutaboiraitena iwíáhéna, Mókake ite néne téhrehrabeq kaweqtaq míagehe úwe. Mi iwíáhwé peh wewene iwíáhe.

24 Manikánka íre peh morá ite Ísara keyábé arutaboiraitena omaq itowe. Wega nahnsó keyábé moq arutaboiraritena omaq sitowe.

25 Minayabe Manikáne ehweh irarú ani wenáwíq Óséaga púkuipéq sehiranéna Manikáne ehweh mahraréna,

Nahnso keyábé, Menah ite íre nánuwahrah ke woe. Itensabé, Nánuwahrah kee aritaníe.

Íre nirutaboirurau keyábé, Nirutaboiruge
aritaníe úwe ire. *(Hosea 2.23)*

26 Mi ehwéhnká mó mahraréna,
Wega mi keyábé, Ite íre néne animári móe
arítáráurabeq, Ite íné oga mía míau Manikáne
animári móe aitaníe úwe ire. *(Hosea 1.10)*

27 Manikáne ehweh irarú ani wenawíq Áísáíaga
naho Ísara keyábé iwíáhéra anotahtaq mahraréna,
Nahmbísibeq arahwé áhnte kékhe. Ísarane
anahwaréh mina tahnsa áhnte agirana
Manikánka peh táhmaro kaweraritankéhe.

28 Wega mó mah kehiná kékhnánsábé ehweh
aritená apubúue kamah arinawire úwe. *(Aisaia
10.22,23)*

29 Minayabe Áísáíaga mó mahraréna,
Itene moke miraorahi Wahnáhnká anotahtaq
kamah aiená íre túbáh agútaq tahirímé
wega Sóróma suwahpeqte kéréq Kómóra
suwahpeqte kéréq subipáhrarutonserah
iteinahréh moq subipáhrarúeh irino úwe.
(Aisaia 1.9)

Ísara kegá íre aiq pútare ató ehwehne.

30 Mi ehwéh ireq aneq iwíáhonehnkono? Téhwe
nahnsa kegá kaweqtaq méyabe íre sirutaboiruwe.
Amahnága sega Manikáne ehweh irera aiq pútare
atáhnsábé Manikánka sensabé, Ite kaweqtaq
míahwe aritéhre.

31 Ísara kegá Mósísiga sehgóro ú ehweh sehgióne-
heqmúne éra mi ehwéh íre sehgoráhowe. Mi-
nayabe se kaweqtaq íre míahrahowe.

32 Aneqsabébo? Segá íre aiq pútare atera peh
seyene arambehriyabé iwíáh iwíáhowe. Minayabe

wehukega ahtate ébáh íre tagéra siyobetaq pegue inahnsubónserah sega íre aiq pútare atera peh áhwára áhwáraowe.

³³ Minayabe Manikáne ehwehnka aiq mahraréna,

Tagaríáhro. Íné Sáíóna sawéhrápéq* Ísara kené ah-tapeq siyobetaq pegue inahnsuboráhi ebáh máróge. Mitaq kéhnsábé wehukega sura-honeherawoe. Wensabé aiq pútare atáh ké íre siyehitanawire ire. (*Aisaia 8.14, 28.16*)

10

Ísara kegá Manikáne sansa íre írátíáh éhwéhne.

¹ Néne iyahnabo anímáríno, íné anotahtaq nuwahbehme Manikánka Ísara ke nánuwahrah merirena kaweraritankeheéna púreq aruqaruruge.

² Íné teiúmé sega Manikáne sansá sehgieyabe sírara peh mi sansá íre ahtebah puara áhwára áhwáraowe.

³ Manikánka wehuke kaweraitéh sánsá íre ahtebahwe. Peh seyene iwíáho sansá míra aruqaruronsabé Manikánka kaweraitéh sánsá íre sehgówe.

⁴ Mósí sine ehwehnka itensabé, Kaweqtaq míáhwe íre aitahráhirana peh morá Sísa Karáhéga itensabé, Kaweqtaq míáhwe aitahráhire. Minayabe Manikánka moke Sísansabé aiq pútare atáh keyábé, Ite kaweqtaq míáhwe aitéhre.

* **9:33:** Sáíóna sawéh Sarúsarama su wahpeq kékre. Mó kegá Sarúsarama su wahpeqsabé Sáíónae ue áwíratówe.

⁵ Mósísiga sehgóro ú ehweh sehgó kékabé wega
naho sehiranue mahraréna,
Néne ehweh kawerue sehgóra kegá oga mía
míagehe úwe. *(Wok Pris 18.5)*

⁶ Manikánka Sísansabé aiq pútare atéh áninsábé,
Are kaweqtaq míahne atéhrana Manikáne ehweh
sehgíre. Mi anínká iraréna, Insegá íopeq pokinabo
itene irupipeq iwiáhiyeho ire. Sísa Karáhé íopeqté
kiweranehe íwíáho? Mira íwíáh íre oro.

⁷ Mi anínká mó mahraréna, Insegá pusa ké
míáhrabeq pokinabo kaseniyeho ire. Sísa Karáhé
pusa ké míáhrabeqte tumeranéhe íwíáho? Mira
íwíáh íre oro.

⁸ Mi kasé éhwéhnsabé Manikáne ehwehnka
mahraréna,
Néne ehweh peh wahtotaq kéné itene irupipeq
kéhraq íwéhrate irarewe ire. *(Lo 30.12-14)*

Mi ehwéhmé aiq pútare atona ehwéhnsabé
íwáhnorúne.

⁹ Íwáhnoréq mahraue teiune. Sísa néne Wahnah
mire íwéhrate iraréq wega pukútaq Manikánka
iriwe organúq atonsabe irupipeq iwiáhirataq wega
meirena kaweraitankéhe.

¹⁰ Manikánka irupipeq aiq pútare atáh ké insahwé
aitena íwéhrate, Sísa néne Wahnah mire irare ke
kaweraitéhre.

¹¹ Minayabe Manikáne ehwehnka aiq mahraréna,
Wensabé aiq pútare atáh ké íre siyehitanawire ire.
(Aisaia 28.16)

¹² Manikánka Ísara kereq nahnsó kereqsabé peh
morá íwíáhire. Itene Wahnahnka Ísara kereq
nahnsó kereq wahnahnaitena wensabé áhrabo
kené ehweh irena kaweraitena séhréh aitéhre.

13 Minayabe Manikáne ehwehnka aiq mahraréna,
Are néne Wahnah míahno. Íné séhréh ainto ue áhrabira kewé Manikánka kaweraritanawire ire. *(Joel 2.32)*

14 Wehukega Sísansabé íre aiq pútare atéhrataqmé árahue néne Wahnah mé íné séhréh ainto ue áhrabigehbo? Sísa éhweh íre íréhrataqmé árahue aiq pútare atagéhbo? Sísa éhweh terí ání íre míahnaraqmé árahue iragéhbo?

15 Sísa éhweh terié ké íre eqmaq súéhrataqmé árahue korerigéhbo? Minayabe Manikáne ehwehnka aiq mahraréna,
Kaweq ehwéh teríra ke sirara tagehrataq sene sirupipeq eyoyóinae ire. *(Aisaia 52.7)*

Áhnte Ísara kegá kaweq ehwéhnsábé íre aiq pútare ató ehwehne.

16 Moke kaweq ehwéh íráh kégá mi ehwéh sehgioo? Írakaumo. Minayabe Áísáíaga naho mahraréna,
Itene Wahnahno, itega teriuna ehwéhnsábé inséréhga aiq pútare aitaho úwe. *(Aisaia 53.1)*

17 Ite tagarionawe ite Manikáne ehweh ironaraq aiq pútare atone. Mah ehwéhmé Sísa Karáhéga téh irarúwe.

18 Minayabe kasenuge. Ísara ke mi ehwéh íre írátóo? Sene ahrerate mi ehwéh aiq írátówe. Minayabe Manikáne ehwehnka aiq mahraréna,
Se míáhrabeq mi ehwéh aiq teriatowara íráhwe.
Mi ehwéhnsák mah marákó mårákóípéq aiq abae agire ire. *(Buk Song 19.4)*

19 Mó kasenuge. Ísara kegá mi ehwéh áwahe íre ahteboo? Ahqáho. Segá aiq ahtebowe. Minayabe Mósísiga sehiranéna Maníkánka irarú ehweh mahraréna,
 Nahnso ke íre áwíqkakaq ké míáhwe. Se íre anotah ke míáhwe. Se íre ahtebah ke míáhwana ínéga mi ke kaweraritahnaraq itega abi-ahnsa ariteq taonsahoneheqmóe úwe ire.
(Lo 32.21)

20 Áísáíaga íre áhreia Maníkánka irarú ehweh pah-suqme mahraréna,
 Ínénabe íre ninebahru kegá ínéba sewe. Ínénabe íre kabaruro kebá ábóraragurauge úwe.
21 Ísara keyábé Áísáíaga mó sehiranue Maníkánka irarú ehweh mahraréna,
 Ahriahri mi ke séhréh ariteyabe nírara se saiyoéra néne ehweh anteruq anteruowe úwe. *(Aisaia 65.1-2)*

11

*Maníkánka Ísara keyábé arutaboirarito
 ehwehne.*

1 Ísara kewe saiyo ke míáhnsábé kase ehweh kékre. Maníkánka sensabé anetaníbo éna kaq-suehro? Írakaumo. Ínéwé Ísara aní múge. Íné Ébáráhmane anahwa úge. Íné Pénsámíni kahnáh ání múge.

2 Maníkánka naho íwíáhue omaq sito ke amahnága íre kaqsuéhre. Maníkáne ehwehnka Éráísa éhweh irarime aiq ahtebaho? Éráísaga Ísara kené ahbabáqsabe Maníká teawena,

³ Néne Wahnahno, sega arene ehweh irare ke aiq subiq sutowe. Arensabé iwíáh iwíáh atonarabeqte táhbé aiq sokorúáhwe. Ínébataq míónsábé sega íné ninebahrue nubiq suaneherawoe úwe. (*1 King 19.10,14*)

⁴ Mi ehwéh mirarúnsabe Manikánka aneq ehwéh teawuwo? Wega mahraréna,

Ínéga se omaq sitó púara áhnte wehuké 7 táchuséni (7,000) wehuké íné íre nuwera péhe mániká wenawíq Páhrinsabé íre káuqmunue iwíáh iwíáh atáhwe úwe. (*1 King 19.18*)

⁵ Mina inserah ibora táhmaro ke Manikáne sansá íre susa peh kaweqtaq míáhwe. Manikánka ite arutaboirue séhréh aitena, Néne animári móe ue omaq itéhre.

⁶ Íre itega arambehriúnayabé peh wewega arutaboirue séhréh aitena omaq itéhre. Manikánka itene arambehriúnayabé omaq itéhtáq tahirímé séhréh aite sansa íre kék irino.

⁷ Minayabe aneq iwíáhonehnkono? Áhnte Ísara kegá, Kaweqtaq mé sansa sehgioneheqmúne éra íre miraorahowe. Peh morá Manikánka omaq sito kega ahtebowara mó kegá sirupipeq íre irahráhuwe.

⁸ Minayabe Manikáne ehwehnka aiq mahraréna,

Manikánka múguwahgu iwíáh aritowara se súgó ke tahnza úkéra pusa ké tahnza úkuwe. Sene siuranka íre tagia sene siahrega íre irahráhowe. Amahnágaákáq se mina tahnza míáhwe ire. (*Lo 29.4; Aisaia 29.10*)

⁹ Tébítiga minayabe aiq mahraréna,

Kahnkapi wah pariéhrana tahkapi póéráhq
subitíehrana ebahnka wehukeníné aigárá
subínserah sega wahba táchutáhúrorabeq
anotah kamáh ariena subipáharuanawire.

¹⁰ Sene siuranka íre tagahrahéra múguwahguigehe.
Se sibobiah antera ké tahnsa ahriahri nogigéhe
úwe. *(Buk Song 69.22-23)*

Manikánka nahnsó ke kawerarito ehwéhne.

¹¹ Íné kase ehweh kéhre. Ísara kegá Manikánka kawerarítéh sánsá íre ahtebahnsabé ahriahri peh ahbabáq ke míaneherabo? Ahqáho. Írakaumo. Segá Manikáne sansánsábé, Iuwahriehre ensabé we awahbeh sansánue nahnsó ke kawerarítéhre. Ísara kegá mina tagéra iwíáhéra, Ite minayabe iuwahbehre. Ite moq kaweraito igeheeéna nahnsó ke kawerarítéhre.

¹² Ísara kegá Manikánka kawerarítéh sánsánsábé iuwahriehre ensabé Manikánka mah kehiná kéhíná séhréh arítéhre. Ísara kegá Manikáne sansá sinehepeq súónsabe wega nahnsó ke séhréh arítéhre. Mókake áhnte Ísara kegá Maniká awahbeh sansánsábé suwahbáhnaraq ite tagarionawe mi kereq mó kereq áhnte kaweraritankéhe.

¹³ Nahnsó keo, amahnága ite ehweh teiúge. Manikánka ínénabe, Néne ehweh nahnsó ke korriero éna eqmaq núwátái puana néne arambehri áhnte kaweq arámbéhrí wíre íwíáhuge.

¹⁴ Mira íwíáhunsabé táhmaro nánuwahrah Isárá kegá néne arambehri tagéra iwíáhéra, Manikánka ite moq meirena kaweraiteyabe iuwahbehre éra Manikápa kouwekirataq kaweraritankéhe.

15 Manikánka Ísara keyábé ahqáho aritonsabe nahnsó ke insahwé aritená kawerarítéhre. Wega Ísara keyábé kowé aritahnaraq se pusa kék ogá úkonserahnue míagehe.

16 Asiu kegá sene sánsánéra ákáhtaq wíti paráwáh mewe páréti tímítáq peh morá páréti Maniká áwéwe. Maniká áwé puara mó ákáhtaq wíti paráwáh mewe tímító páréti moke Manikáne wire. Manikánka awanká ánúq matiahnaraq moke ayahnaweaq wewene úkire.

17 Ísara kewé kaweq oríwí awanká tahnsa míáhwaq ite nahnsó kewé abehq oríwí awanká tahnsa míáhwe. Manikánka kaweq oríwí awanká ayahnawe apiruena ite abehq oríwí awanká ayahnawe mitaq táhparená táhrarowana kaweq awanká ano kékhsabé kawerue kíréhre.*

18 Ite amahnágá kaweqtaq míáhnsabé Ísara ke kiotaikúne íwíáhiyehboq peh tábúsoqme iwiáhoro. Ite awanká ayahnawe tahnsá míáhwe. Awanká ayahnawe anonka ánúqtaq íre tuire. Írakaumo. Awanká ánúq anonka ayahnaweraapeq kíre.

19 Itega mahrraréq, Manikánka ite awanká ayahnawe ákáhnababí táhparaníeéna mibeqté áyáhnawé apirutaire eme

20 aiq pútare atáhnsabé apirúéhre. Ite nahnsó ke Sísansabé aiq pútare atáhnsabé Manikánka ite kaweq awanká ákáhnababí táhparéhre. Minayabe ite píribahriiyehboq áhreue míáhro.

* **11:17:** Ísara kegá sene sánsánéra oríwí awanká íre kaweq ayáhnawé apiruera mó kaweq awankátápéqté áyáhnawé apiruqme mitaq táhparera táhraráhwana kirena kaweq oríwí sérá íyéhre.

21 Manikánka téh kárái ayáhnawé apirutainserah ite píribahri ke míehrataq ite moq apiruankéhe.

22 Kawerue iwiáhoro. Manikámé arutaboiri aní ména kamah aieráhi aní míehre. Wega wene sánsánsábé suwahrieh ke kamah ariena ite wene ehwehnsabé suwahbeh keyabé arutaboirire. Wene ehweh íre sehgírataq ite moq apiruena kamah ainkéhe.

23 Manikánka apiruo ayáhnawéwé táhparená táhrawe kawerarahráhire. Ísara kegá sene píribahri sansá suera aiq pútare atéhrataq wehukenínká apirúeh áyáhnawé kaweraréhnserah Manikánka Ísara ke kaweraritahráhire.

24 Wehukenínká abehq óriwí áwánká ayahnawe mewe kaweq oríwí áwánká ákáhnababí táhparená táhrawe kaweraréhre. Mina inserah Manikánka ite nahnsó ke kaweraitáráire. Kaweq oríwí áwánká ayahnawe mewe seyene kaweq oríwí áwánká ákáhnababí táhparená táhruue kaweraréh sánsámé íre págege sansáne. Mina inserah Manikánka Ísara ke mókake kaweraritankéhe.

Manikánka nahnsó kéreq Ísara kereqsabé arutaboiri ehwéhne.

25 Néne iyahnabo anímáríno, itega kawerue ahtebageheéna menah Manikánka íre pahsutai ehwéh amahnága teiníe. Ite ahtebehrataqmé píribahri anímári íre míagehe. Amahnága Ísara kene sirupipeq págegeéra Manikáne sansá íre íráhwe. Mókake nahnsó kegá awehraq wene sansá sehgírataqmé Ísara kegá iragéhe.

26 Mi tanáhráqmé Manikánka moke Ísara ke merirena kaweraritankéhe. Minayabe Manikáne ehwehnka aiq mahraréna,

Kaweraritahna anínká Sarúsarama suwahpeq
síñaraq wega Sékópane anahwaréhne
ahbabáq kaqsuankéhe ire.

27 Manikáne ehwehnka mó mahraréna,
Sigaqnaréh teriunserah sene anahwaréhne ah-
babáq kaqsuaníe ire. (*Aisaia 59.20-21;*
Jeremaia 31.33)

28 Ísara kegá Sísa éhweh irera iuwahriehre
ensabé Manikáne naruo úkurowaq ite nahnso
kegá mi ehwéh ireq sehgówe. Manikánka
Ísara ke téh omaq sitena sigaqnaréhyabe nahoh
arutaboirú púana amahnága sinahwaréhyabe moq
arutaboirire.

29 Manikámé íre mó iwíáh mó iwíáhi aní míre.
Wega náwinie íwíáhínaraqmé náwinawire. Wega aiq
omaq sitóge ínaraqmé anehemé íre kaqsuankéhe.

30 Menah ite nahnso kegá Manikáne ehweh an-
terutowara amahnága Ísara kegá wene ehweh an-
terúáhnsábé wega itensabé arutaboiréna séhréh
aitéhre.

31 Ísara kegá Manikáne ehweh anterúáhwana
Manikánka itensabé arutaboiréna séhréh
aitéhnserah mókake sensabé arutaboiréna séhréh
aritankéhe.

32 Ómi kegá wene ehweh anterúónsabe
Manikánka, Ahbabáqka ite saiqnariankehe
aritéhre. Anehe wega mah kehiná kékéhínásábé
arutaboiréna séhréh aritankéhe.

Manikánsabe iwíáh íwíáh atanéhe i ehwéhne.

³³ Manikámé áhnte séhréh aitéh ání ména moke tagarawéna anotah ahtébíá ání míre. Ite peh we-huke míona puaq wega tábúsoqme iwíáhi sansámé itega íre ahtebahrahúne. Wega mirai sansámé itega íre ahtebahrahúne.

³⁴ Minayabe Manikáne ehwehnka mahraréna, Wehukenínká itene Wahnahne iwiáhwé ahtebahrahiro? Írakaumo. Wehukenínká we áwáhnororahiro? Írakaumo. ire. (*Aisaia 40.13*)

³⁵ Wene ehwehnka mó mahraréna, Wehukenínká Maniká ebeq náwinana Manikánka íné nánino íwíáhono? Írakaumo ire. (*Jop 35.7, 41.11*)

³⁶ Manikánka wewega moke kék néneq mirarowe. We moke kék néneq áwahe wíre. Minayabe moke kék néneq peh wewene wíre. We anotah aní púaq ahriahri wensabé iwíáh atone. Aiq míre.

12

Itene inónká Maniká awe ehwéhne.

¹ Néne iyahnabo anímáríno, néne ehweh kawerue íráhro. Manikánka ite kaweraitená séhréh aitéh púaq itene inonka we áwero. Ite oga míáhtáq itene inonka we náwíransabé kaweqlaq méq we awahbeh sansánoro. Minawé Manikánsabe iwíáh iwíáh atáh sásáne.

² Itega Maniká awahbeh sansánigeheéna wega itene irupipeq o iwíáh aitéhre. Mah marákó márakóípéqté sásá sehgíehboq peh Manikánka iwíáh aitéh sásánoro. Mirairataq Maniká awahbeh arámbéhri miraéq wene kaweq tábúsoréh sásámé we awahbeh sansámé ahtebahrahowe.

Manikánka náíátái pagégerátē wene arambehri sehgíóro i ehwéhne.

³ Manikánka íné séhréh aintéhnsábé ínéga teiéna ehwéh íráhro. Itega, Íné anotah aní múge éq arerensabé iwíáh iwíáhiyeho. Írakaumo. Arerensabé peh tábúsoqme iwíáhoro. Manikánka aiq pútaq iwíáh aitéhnserah tábúsoqme iwíáhoro.

⁴ Wehukeníné anonka peh morá ánónkánirana áhnte naneq kéhre. Mi naneqmarínká íre peh morá árámbéhrí miraorahowe.

⁵ Mina inserah moke ite Sísa Karáhé tagariona kewé áhnte méq Sísane anonka tahnsá míone. Ite íre peh morá árámbéhrí miraúne. Íre itebataq itebatarue mía ite peh morá ánónká tahnsa míone.

⁶ Manikánka séhréh aitená wewega mó arámbéhrí mó arámbéhríue iátáire. Minayabe ite íre peh morá árámbéhrí kéhre. Manikánka arensabé, Ínéga iwíáh atahna ehwéh irarúno atahnaraqmé arega aiq pútare atahnanserahnue pahsuo.

⁷ Séhréh arito atahnaraqmé kawerue séhréh arito. Síwáhnorúno atahnaraqmé tábúsoqme síwáhnorúno.

⁸ Mó kené iwíáh kawerarito atahnaraqmé tábúsoqme miraúno. Wehwehúno atahnaraqmé eyoyóue wehwehúno. Wahnhahnúno atahnaraqmé tábúsoqme iwíáhue wahnhahnarito. Mó keyábé arutaboirarite séhréh arito atahnaraqmé eyoyóue séhréh arito.

Mó Sísa tagariáh keyábé arutaboirarito i ehwéhne.

⁹ Mó keyábé aiq pútaq irutaboirarítáhro. Moke ahbabáqsabe anotahtaq ahqáho ato. Ahbabáq

sansa pehragéq peh kaweq sansá ambubuue sehgóro.

10 Iteruwahrahyabé irutaboironserah moke Sísa tagaríah kékabé moq irutaboiréq sensabé iwíah íwíahhéq sensíwíq pankeráhro. Íre arene áwíq peh mó ke síwíq pankeráhro.

11 Manikáne arambehriyabé taorahoiyehboq tauntahunue arambehrioro. Manikáne Awanka iwíah aitéhnserah itene wahnahnsabé iwíah íwíah ateq wene arambehri kawerue sehgóro.

12 Manikánka mirainawire íwíahhéq itene irupipeq eyoyóue míáhro. Íre kaweq sunúq sinaraq uwaresa ké méq kaweqtaq míáhro. Púreré sansa taorahoiyehboq ahriahri púreq aruqaruroro.

13 Sísa tagaríah ké tabonahirataq náriéro. Nahnso ke sirataq mehwehue kawerariteq kirabo arítáhro.

14 Mó kegá ite íwíoqnehrataq Manikánsabe, Mi ke kamah ario íre oro peh kaweraritoue púrerarítáhro.

15 Mó kegá eyoyóue iwíah íwíahirataq ite moq eyoyóue iwíah íwíahoro. Sirupipeq umehínaraq ibisehrataq ite moq irutaboirariteq íbisahro.

16 Ómi keyábé peh monseráh sánsánoro. Ite anotah ke úne éq píribahriyeho. Írakaumo. Ite anotah ke púaq íre áwíqkakaq kékabé iuwahriehre iyeho. Sereq méyabe iwíah íwíahoro. Íre áwíqkakaq árámbéhríyabé iuwahriehre iyeho. Itebataq ahtebone éq iteitensabé iwíah íwíahiyeho.

Ite ahbabáraitéhra ke séhréh arítáhro i ehwéhne.

17 Mó kegá itensabé íwíognéra ahbabáraitéhrataq itega moq sensabé mina tahnsaniyehboq peh uwaresa ánímári míáhro. Ómi ite tagah kegá, Kaweq sansáne íwíahigeheéq peh kaweq sansánoro.

18 Taonsah iwiáh tobéh iwíáh iyehboq uwaresa ké míáhro. Árahue mó kereq iru ukiqme míanehnkono éq mina tahnsanue sereq iru ukiqme míáhro.

19 Néne iyahnabo anímáríno, mó kegá ite ahbabáraitéhrataq se íre ahbabáráritáhro. Manikánka se kamah arieráhire. Wene ehwehnka aiq mahraréna,

Ínénéne arambehri puana ínénéga kamah arin-
auge ire. *(Lo
32.35)*

20 Wene ehwehnka mó mahraréna,
Are ahbabáratahna anímé, arene naruo anímé
arupinsabe ínaraq kirabo ato. We wání tah-
bobóire ínaraq wání náwo. Arega mirainaraq
we ayehitanawire ire. *(Sindaun 25.21-22)*

21 Ahbabáqka are saiqnariehnehboq kaweq
sansánúno. Arega mirainaraq arene kaweq
sansánká ahbabáq sansa kiotaikinae.

13

Kámáhni kené ehweh sehgóro i ehwéhne.

1 Ite moke kámáhni kené ehweh kawerue sehgóro. Ite tagarionawe wahnah kegá pehipi íre wahnahnowe. Írakaumo. Manikánka wahnah sansá áhwárówe. Áhwárarowara amahnága kámáhni kegá wahnahnome webaqtaq Manikánka, Wah-nahnoro aritéhre.

² Minayabe kámáhni kené ehweh anteruahnaraqmé se Manikánka wahnahnoro arítéh kéné ehweh anterúáhwe. Anterúáhnsábé ehweh aritena kamah arinkéhe.

³ Kaweqtaq mía míao kegá sene wahnah keyábé íre áhreowara peh ahbabáq kega sene wahnah keyábé áhreowe. Ite íre áhreigehboq peh kaweqtaq méq itene wahnah kené ehweh sehgóro. Mirairataqmé wahnah kegá itensabé, Kawerowe aitagéhe.

⁴ Itega kaweqtaq míageheéna Manikánka wahnah keyabé, Néne arambehri miraigehboq wahnahnoro arítéhre. Ite ahbabárirataq wahnah kegá kamah aieráho puaq sensabé áhreoro. Se ahbabáq ke kamah arirana Manikánka kawerowe aritankéhe.

⁵ Itene wahnah kené ehweh anteruahnaraqmé kamah aiyehboq sehgonéhe íwíáhoo? Íre peh morá mi iwíáhiransabé sehgóro. Wahnah kené ehweh irona sansámé kaweq sansáne iwíáhéq irupipeq eyoyóue sehgóro.

⁶ Manikánka wahnah keyabé, Wahnahnoro arítéhnsábé tákísi moné síero. Sega sene wahnah árámbéhrí kawerue miraigehboq síero.

⁷ Minayabe seyene arambehri kahna naneq síero. Tákísi moné meyáh ké tákísi moné síero. Áráhísínísi moné meyáh ké áráhínísi moné síero. Wahnah keyabé siwiréh arítéhboq peh sensabé iwíáh íwíáhéq ayahmaq síero.

Mó keyábé arutaboiroro i ehwéhne.

⁸ Arega mó anínsábé mónebopoq aneqpopoq, Nánio. Mótaq náwiníe inaraqmé arene tínáhu

túbáh aginehboq apubúue náwo. Itene tínáhu ahri-ahri apubúue parabarúáhro. Peh morá tínahú ahriahri kagaire. Mi tinahuwé mó keyábé ahri-ahri irutaboiroro. Mó keyábé sirutaboiro kegá Manikáne ehweh moke sehgówe.

⁹ Manikáne ehwehnka mahraréna,
Mó kené ahre weh abariiyeho. Mó aní
subiq súého. Aebóiyeho. Mó aníné
ménksaménsánsabe aigará pabekíneho ire.
(Kisim Bek 20.13-17; Lo 5.17-21)

Anehe Manikáne ehwehnka mó mahraréna,
Arerensabé arutaboirónanserah mó keyábé moq
arutaboirúno ire. *(Wok Pris 19.18)*

Mó keyábé arutaboiré ehweh sehgrataqmé
ebeq teí éhwéhnkákáq moke mó miraoro ú
ehwehnkákáq aiq sehgówe.

¹⁰ Mó anínsábé arutaboiri anínká mi aní íre ahbabáratéhre. Minayabe mó keyábé aiq pútaq
sirutaboiro kegá moke Manikáne ehweh sehgówe.

*Tábúsoqme méq peh kaweq sansá tauntahunue
sehgíoro i ehwéhne.*

¹¹ Mah tanáhráq tagariona puaq kaweqtaq méq
Manikáne ehweh sehgióro. Ite kaweraiteh aní
tuina tanáhráq áhnibóráni puaq sugéhboq peh
áwénunéq kawerue auráq matíáhro. Itega Sísansabé
aiq pútare atárótaq we tue tanáhráq ákáhtaq wahko
káráire. Amahnága we tuina tanáhráq peh wah-
tonagire.

¹² Inokáhpeq parabagina irana tuekína tanáhráq
sinaire. Mina inserah mah tanáhráq áhnibórá
parabagina irana Sísaga tuinaire. Minayabe itega
sunkíkírirabeqte áhbábáq sánsá sueq téhrehrabéqte
kaweq sansánoro.

13 Uwoyansamé, píah néra múguwahgu agéwé, mó aníné ahre weh abariéwé, ahkaragárawe, tobehwé, mó keyábé aru págege atewé, mina tahnса áhbábáq súáhro. Peh morá téhrehrabeqte kaweq sansá miraoro.

14 Ahbabáq iwiáhiyehboq peh morá itene Wahnah Sísa Karáhéba wahtotaq méq wene sansánsabé iwíáhue sehgíoro.

14

Mó Sísa tagaríáh kéné sánsá íre saraqme tagahro i ehwéhne.

1 Sísansabé aiq pútare atéh áninká Sísame sánsá íre kawerue ahtebéna iteba sínaraq mehwéh ateq séhréh atáhro. We íre ahtebehnsabé ehweh atého.

2 Mó Sísa tagaríeh áninká moke táhutahuq nah nanere íwiáhéra pehipi nehrana mó Sísa tagaríeh ání íre págegeue aiq pútare atéh áninká nah naneqpomo éna we awehrii naneq íre nehre.

3 Neh aninká íre neh anínsabé awiréh atéhneho. Awehri aninká neh anínsabé ehweh atéhneho. Írakaumo. Manikánka moke táhutahuq neh anínsabé, We moq néne ani míre atéh púaq wega táhutahuq nehnsabé ehweh atéhneho.

4 Mó aníné arambehri anínsabé aneqsabé ehweh ataho? Minawé íre itene arambehri wire. Wewene wahnahnka wene sánsá tagéna tábúsoq atahráhire. Maniká itene Wahnhahnka arambehri aní séhréh atéh púana wene wahnahne arambehri kawerue mirainawire.

5 Mó aninká ahrena ahrena wehekáhnká moke mó wehekáh kiotaikire íwíáhirana mó aninká moke wéhékáh peh monseráhnire íwíáhire. Minayabe

itene irupipeq iwíáhue tagéq peh kaweq sansá miraoro.

6 Ahrena ahrena wehekáhmé Manikánsabe iwíáh iwíáh tanahráre iwíáhi anínká Manikánsabe iwíáhi puana mira iwíáhire. Moke táchutahuq neh anínká Manikánsabe iwíáh iwíáhéna moke táchutahuq nehnabé Maniká awahbeh sansáne iwíáhire. Íre neh anínká awehrime Maniká awahbeh sansáne iwíáhéna we moq Manikánsabe iwíáh iwíáhire.

7 Iteitene iwíáhúna sansá miraúnayabé oga míono? Írakaumo. Ite pukonaraq iteitene mátaburapeq kowíanehnkono? Írakaumo.

8 Peh Maniká itene Wahnah awahbeh sansá miraoneheeéq oga míone. Ite pukonaraq itene Wahnahne kaweq matábúrapéq kowíanehe. Ite oga míonaraqkákáq pukonaraqkákáq ite Maniká Iteribone animári míaneheqmúne.

9 Sísa Karáhéga oga míona kereq puko kereq wahnahnaitanieéna pukéna iriwe organúkúwe.

10 Mókake ite moke Manikánka wahnahnirabeq iriwe perehnehnue míahnana wega itene oga mé sansamé itene arambéhriwe tagéna saraqmaranawire. Minayabe mó Sísa tagariéh ánínsábé, Are abehq sansánóna aní móne atéhneho. Wega mirai sansansábé awiréh atéhneho.

11 Manikánka saraqmarahna tanáhráqsábé wene ehwehnka aiq mahraréna,

Íné oga mía míau Wahnáh aní míogara moke mah kehiná kéhínánká ínéba séra sirehunseraráq méra ínénasabe, Are aiq pútaq Maniká móne aintanehrawoe ire. *(Aisaia 45.23)*

12 Minayabe mi tanáhráq itega miraurauna sansánsábé morá áninká morá áninkáue Maniká teaweneheqmúne.

Ahbabáq sansa mó aní insoq atéhnehboq suaníe i ehwéhne.

13 Mó Sísa tagariéh áninká miraínsabe, Abehq sánsánire atého. Ínéga mirau sansámé wega tagéna ahbabárinehboq mi sansá suena mó íre mirainie íwíáhoro.

14 Sísa itene Wahnahnka néne iwíáh aiq kaweraintéhnsábé íné tagariómé Manikánka moke táchutahuq nah nanere ire. Minayabe moke táchutahuq noge. Mó aninká mó naneq tahutáhúqsábé, Íre nah nanere ínaraq mina awehrinkehe.

15 Itega nahwana mó Sísa tagariéh ánímé iwíáh kikiritaq wega itene táchutahuqsabé, Órira míre atéhnaraqmé mi tahutáhúq mó neho. Iwíáh kikiri anínsábé, Anetaníbo pehipi nanie i aninká we íre arutaboiratéh ání míre. Sísa Karáhéga iwíáh kikiri aníné ahbabáqsabe putionsabe itega nehranka ahbabáratého.

16 Itega, Kaweq sansáne íwíáhígé mirairara mó kegá tagéra, Íre kaweq sansáne íyehboq mi sansá mó íre miraoro.

17 Manikánka ite wahnahnaitéhnsábé itega táchutahuqsabé íre iwíáh íwíáhúne. Írakaumo. Peh kaweqtaq méyabewé, iru ukiq iteyabewé, iru eyoyó aiteyabewé iwíáh íwíáhúne. Manikáne Awanka minawari iwíáh aitéhre.

18 Manikánka Sísa Karáhéne arambehri miraue sehgió kékabé, Kawerowe aritowara tagah kegá, Se kaweq ke wóe íwíáhighehe.

19 Minayabe moráénue Sísane sánsá miraone-heéq we séhréh atéhonehe íwíáhoro.

20 Moke táhutahuqme nah nanere aiq pútaq ehwéhne. Peh táhutahuqsabé íwiáh íwíáhónaga Manikáne arambehri íre kawerarúéhneho. Arega náhna tahutáhúqmé mó anínká tagéna, Órirane íwíáhéné wene órira sansámári suena ahbabárinaraqmé arega we aiq ahbabáratahne.

21 Sísa tagariéh áninká are tagéna arega miraónaga ahbabáratehnehboq mina íre miraúno. Minayabe órira tahutáhúqkákáq píahakáq náhnaga mó Sísa tagariéh ání ahbabáratehnehboq íre náhno.

22 Arega miraóna sansámé, Kaweq sansáne íwíáhé mó anínsábé, Ínéga mirau serahnúno ue teawíneho. Arega miraóna sansá peh Maniká teawo. Kaweq sansánuge íwíáhi anímé wene arupipeq íre umeh agínana wega íwíáh íwíáhinkehe.

23 Mó anínká íwíáhéné, Mah tahutáhúq nonka kaweq sansánugapómo éna náhnaraqmé wega ahbabárinae. Aiq pútaq kaweq sansáne íwíáh íre kahnaraq wega ahbabárinae. Moke itene sánsámé aiq kaweq sansáne íwíáh íre kéhtáq mi sansánúnawe itega aiq ahbabárúne.

15

Sísa Karáhéné sansá sehgioneheqmúne i ehwéhne.

1 Ite Sísane sánsá ahtebóna kewé séhréh arite arámbéhri kékre. Sísane sánsá peh ákáhtaq ahtebah kegá tábúsoqme sehgigeheéq séhréh aritanéhe. Íre peh iteitensabé iwíáhia peh séhréh arite iwíáhonehe.

² Itene iyahnabo anímári Sísane sánsá ahtebéra kawerue sehgigeheeéq íre ite iuwahbeh iwíáh peh se séhréh arite iwíáhonehe.

³ Sísa Karáhéga Wenabone arambehri mirainieéna we awahbeh iwíáh suowe. Minayabe Manikáne ehwehnka irarinserah mó kegá Sísa awiréh atowe. Mi ehwéhká mahraréna, Sega arensabé awiréh atáhtáq ínénabe moq ni-wiréh aintáhwe ire. *(Buk Song 69.9)*

⁴ Manikánka iwíáh arito kegá wene ehweh pehipi íre sehiranuwe. Itega sáhnsahwe ahtebageheéra naho sehiranuwe. Itega Manikáne sansá kawerue ambubu atawéq sehgigeheéra sehiranuwe. Itega Manikáne sansá íre sueq peh ite meirena kaweraitahna tanáhráqsábé áwénunigeheéra sehiranuwe.

⁵ Itega Manikáne sansá ambubu atawéq kawerue sehgigeheéna séhréh aitéhre. Ite Sísa Karáhéne sansá sehgieq moráénue peh morá íwíáhigeheéna wega séhréh aitéhre.

⁶ Moráénue peh morá íwíáhirataq itene Wahnah Sísa Karáhéne Abowá Manikánsabe iwíáh iwíáh atagéhe.

Sísa Karáhéga Asiu kereq nahno kereq séhréh aritéh éhwéhne.

⁷ Itega Sísa Karáhénabe aiq pútare atárótaq wega íre ahqáho aitasa peh séhréh aitáráire. Mina urainserah Sísa tagariéh ánínká iteba sínaraq mehweh ateq séhréh atáhro. Mirairame Manikánsabe iwíáh iwíáh atáh sánsá míre.

⁸ Teiníboq írátíáhro. Naho Manikánka ite Asiu kené igaqnansabe omasa éhwéh teriuwe. Sísa

Karáhéga mah marákóípéq míotaq we Asiu aní ména ite Asiu ke séhréh aitowe. Séhréh aitonka sokigi aitomé omasa éhwéh aiq pútaragire.

⁹ Moke nahnso ke moq séhréh ariteyabe áwíre. Sega wensabé iwíáh íwíáh aintageheéna séhréh ariteyabe áwíre. Minayabe Manikáne ehwehnka aiq mahraréna,

Nahnso ke míéhrarabeq arensabé iwíáh íwíáh ataníe. Arenawíq pankerónsábé igonkónue íwíáh íwíáh ataníe ire. (*Buk Song 18.49*)

¹⁰ Wene ehwehnka mó mahraréna,
Nahnso keo, Asiu kereq itereqka moraráq íwíáh íwíáhoro ire. (*Lo 32.43*)

¹¹ Mi ehwéhnká mó mahraréna,
Nahnso keo, ite ómiga itene Wahnahnsabé íwíáh íwíáh atáhro. Mah kehiná kékínánká wensabé íwíáh íwíáh atáhro ire. (*Buk Song 117.1*)

¹² Áísáíaga mó mahraréna,
Sésine anahwa anotah aní míanawire. We antah aní úkéna Asiu kereq nahnso kereq wahnah aritankéhe. Mi tanáhráq nahnso kegá íwíáhéra, Wega ite kaweraitankéhe éra áwénunigehe úwe. (*Aisaia 11.10*)

¹³ Manikánka omasa éhwéhnéna, Áhnte kawéq náneq iníe únsabe ite amahnága áwénunúne. Wensabé aiq pútare atáh púana wega itene iru ukiq itena eyoyó aitankéhe. Manikáne Awanka kawerue séhréh aítéhnsábé ite íwíáhéq, Wene ehweh aiq pútaq ehwéhne. Wega aiq náina puaq áwénunúne ewe.

Poraga nahnso ke Sísa éhwéh teri terinúnsabe éhwéhne.

14 Néne iyahnabo anímáríno, Íné tagaríómé ite kaweq sansá mira aruqaruroro ke wóe. Ite Sísane sánsá aiq ahatabah puaq wensabé wensabé íwáhnoraréh orahowe.

15 Ite ibitarúého éna mah pahsí sehiranue iahreraq ítóge. Manikánka séhréh aintéh púana págegeue teiena pagu pagunuge.

16 Nahnso kegá Manikáne sansá kawerue ahatabéra sehgigeheéna ehweh mibeq mahbeq arítéh ání tahnsanéna wene kaweq ehwéh teri terinuge. Nahnso ke séhréh aitanieéna Sísá Karáhéne arambehri mira aruqaruruge. Nahnso kegá Maniká awahbeh sansá sehgiera kaweqtaq mia míaigeheéna Manikáne Awanka séhréh aritená kawerarítéhre.

17 Sísá Karáhéba mía míáéna Manikáne arambehri kawerue miraunsabé iwíáh íwíáhuge.

18 Mó kené arambehri íre teiúge. Peh morá Sísá Karáhéga séhréh aintaráirana miraurau arámbéhri teiúge. Nahnso kegá mina tagéra Manikáne ehweh sehgiówe.

19 Manikáne Awanka séhréh aintaráinsabé ótaq sansá miraéna ehweh teriátáuge. Nahnso kegá tagéra teriu ehwéh sehgirówe. Sarúsarama suwahpeqkakáq Írírikúma marákórápéqkákáq moke ákáhpeqte ké suwahpeqkakáq Sísá Karáhé ehweh terinurauge.

20 Peh Sísá Karáhé éhweh íre írátiáhrabeq korerieyabe nuwahbehre. Mó anínká nahwiahnsanse pearahnaraq ínémé wene nahwiahnsanseraq abogéhue nah peyabe nuwahriehre.

21 Írakaumo. Minayabe Manikáne ehwehnka mahraréna, We éhweh íre teriu ke tagariagehe. We éhweh íre írátiáh ké siahtebagehe ire. (*Aisaia 52.15*) Mi ehwéhnká irarinserah íre írátiáh ké korerieyabe nuwahbehre.

Poraga Aroma suwahpeq pokéyabe awahbó ehwehne.

22 Nahnso ke teri terinurau arámbéhrígá saiqnariarairana iteba íre korahurauge.

23 Ínéwé áhnte opéq ite tagéyabe nuwahbaraire. Amahnága mahtaqté árámbéhrí aiq parabarúó púana ite koraganie íwíáhuge.

24 Sípení marákórápéq pokonaraq iteruwahpeq kéraganie. Iteba pehgáriq tanáhráq kowéna iuwena pokinieonaraq itega séhréh aintagéhe.

25 Téhwe Sarúsarama suwahpeq Manikáne animári nárinieéna pokinie.

26 Táhmaro mibeqté ánímári tabonah ke míáhnsábé Másérónia marákórápéqté kéreq Ákáía marákórápéqté kéreqka nárieneheéra móne soruparera niátówe.

27 Seyega nárienéhe íwíáhuronka sirupipeq eyoyóuraire. Sarúsarama suwahpeqte kégá Sísa éhweh téh írátówe. Sega irera nahnsó ke teriátówe. Minayabe amahnága nahnsó kegá nárienéhe íwíáhuronsabé aiq kawerurowe.

28 Niátáo moné Sarúsarama suwahpeqte ké aiq náriénaraq Sípení marákórápéq pokonaraq iteba kérágéna kótaikinie.

29 Iteba konaraq Sísa Karáhéga iwíáh aintahna ehwéh teinié. Wega iwíáh aintanawire íwíáhuge.

Poraga, Púreraintáhro ú ehwehne.

³⁰ Néne iyahnabo anímáríno, itene Wahnah Sísa Karáhénabe iwíáhoro. Manikáne Awanka ite iwíáh aitáráiraq itega mó keyábé irutaboirune iwíáhoro. Mira íwíáhotaq págege arámbéhrí ínéreq miraoro. Mi pagégré árámbéhríwé púreq arámbéhrí wíre. Púreréq ínénabeákáq púreraintáhro.

³¹ Sarúsarama su wahpeqte Sísa éhwehnsabé su wahrieh kegá nubíyehboq púreraintáhro. Ínéga mibeqté Manikáne animári kawerue séhréh aritankeheéq púreraintáhro. Sega néne arambehri aiq ábárehre íwíáhigeheéq púreraintáhro.

³² Mi ke séhréh arítáhnaraq Manikánka kowe aintahnaraq iwíáh íwíáhue iteba kinie. Mi tanáhráq itereq ínéreqka ehwehnonaraq irupipeq eyoyóínaq iwíáh íwíáhonehe.

³³ Manikánka ómi itene iru ukiq itena iteba mía míaire. Aiq míre.

16

Poraga áhnte keyábé iroro ú ehwehne.

¹ Íné nu wahbehme Sísa tagariéh íní wenawíq Píbi séhréh atáhro. We Sénkária su wahpeqte íní ména mibeqté Sísa tagariáh ké séhréh aritéhre.

² Áhnte ke séhréh aritena íné moq séhréh aintáráire. Minayabe wega iteba kínaraq mehwéh ateq we tabonah ína naneq séhréh atáhro. Ite moke Manikáne animárinká itene Wahnahnsabé íwíáhéq mó ke séhréh aritonanserah mi iní séhréh atáhro.

3 Sísa Karáhéne arambehriurautaq Ákúírareq Párísírareq mi akéqká moq moráráq arambehriuráne. Sensabé iraotao arítáhro.

4 Segá íné séhréh aintáróyame pukorahuroye. Íre ínélataq moke Sísa tagariáh náhnsó kégá moq mi anítéyábé iwíáh iwíáh arítáhwe.

5 Mi akéqseq sene nahtapeq momiwío ke Sísa tagariáh kéreqsabé iroro arítáhro.

Esia marákórápéq Sísa Karáhé éhweh teriátáutaq mi ehwéhnsábé Épáínétúsaga téh aiq pútare atena sehgiraire. We niruní ání míre. Iraúno atáhro.

6 Mähriaga ite séhréh aitanieéna anotah arámbéhriuraire. Wensabé iraúno atáhro.

7 Nánuwahrah Asíú ánité Ántáróníkureq Súníásareq míéhye. Íné karábúsiipéq míarautaq sega moq mitaq miaroye. Íné Sísa Karáhé íre tagariarautaq sega we tagariaroyara eqmaro kega sensabé iwíáh iwíáh arítárówe. Sensabé iraotao arítáhro.

8 Itene Wahnahne sánsá kawerue sehgí ání wenawíq Ámbíátu míéhre. We niruní ání míre. Wensabé iraúno atáhro.

9 Sísa Karáhéne arambehri miraurautaq Úrabánureq moq moráráq arambehriurauye. Wensabé iraúno atáhro. Mó niruní ání Sítákísansabé iraúno atáhro.

10 Sísa Karáhéne sansá tábúsoqme sehgí ání wenawíq Ápérie. Wensabé iraúno atáhro. Áritóbúru karíronánínseqsabé iroro arítáhro.

11 Nánuwahrah Asíú ání Éróíónansabé iraúno atáhro. Náhsísune nahtapeq kaegaeo Sísa tagariáh kékábé iroro arítáhro.

12 Itene Wahnahne arambehri kawerue mi-raóya aníté sensíwíq Táripínareq Táripósareqsabé iraotao arítáhro. Itene Wahnahne arambehri áhnte miraurai inímé Pérísie. We niruní íní míre. We néne iyahnabo iní míre. Iraúno atáhro.

13 Itene Wahnahne sánsá tábúsoqme sehgí ání wenawíq Árúpansabé iraúno atáhro. Wenanowé náino tahnsa ání úkurainsabé mi inínsabé moq iraúno atáhro.

14 Mó kewé Ásínkárítureq Pégónireq Érémisireq Pátóbareq Érémasareq sereq moraráq Sísa tagaríah kéreqsabé iroro arítáhro.

15 Mó kewé Pírórogureq Súríahreq Néréúsareq wene anahnowáreq Órimbareq sereq míah Sísa tagaríah kéreqsabé iroro arítáhro.

16 Iteite we mehweh atéhoro. Moke mahtaqté Sísa tagaríah kégá itensabé iroro ewe.

Ahbabáq aitahráho keyábé éhwéhne.

17 Néne iyahnabo anímáríno, ehgarogaro anímárínseq ahbabáq aitahráho anímárínseq tagariáhro. Íwáhnoruro ehwéhnsabé ahqáho aitáh ké tagariáhro. Segá míéhrarabeq míéhboq peh móbeq míáhro.

18 Mina tahnsa kégá itene Wahnah Sísa Karáhéne arambehri íre miraéra peh seyene sirupipeqté íwíah míra aruqarurowe. Segá áhnte ehwéhnéra ehnenehne aritéhrataq íre ahtebah kegá mi ehwéh irera kaweq ehwéhne íwíáhowe.

19 Itega Sísane ehweh kawerue sehgónsabé ómiga íráhwe. Minayabe iwíah íwíáhéna nirupipeq eyoyóire. Ahbabáq sansa ahtebehboq pehragéq peh kaweq sansá ahtebahro.

20 Maniká iru ukiq itéh áninká owainawa saiqnarianaire. Itene igaranka noginairabeq saiqnarianaire.

Itene Wahnah Sísa Karáhéga séhréh aitéhre.

Porareq míó kega Aroma keyábé iroro u ehwéhne.

21 Tímóti ínéreq arambehrii aninká itensabé iroro ire. Nánuwahrah Asíú kewé Árúsíareq Sésónireq Sósípáttereqka itensabé moq iroro ewe.

22 Mah ehwéh páhsíipéq sehiranu aní néníwíq Tétiae. Poraga tenínserahnue pépahqtaq sehiranuge. Íné moq Sísane aninéna itensabé iroro uge.

23-24 Mahtaqté Sísa tagariáh kégá Káiúsine nahtapeq momiwíowana wega íné Pora kirabo aintéhre. Wega itensabé iroro ire.

Mah ke su wahpeqte tähkisi moné wahnahni aní wenawíq Érásátie. Wereq itene iyahnabo aní wenawíq Kúátsareqka itensabé iroro éye.

Manikánsabe iwíáh íwíáh atanéhe i ehwéhne.

25 Manikánsabe iwíáh íwíáh atone. Ínéwé kaweq ehwéh Sísa Karáhé éhwéh teri terinuge. Itega mi ehwéh ireq sehgigeheéna Manikánka págege aitéhre. Naho mi ehwéh íre ábóraragia peh kopípéq kowe.

26 Kopípéq kowana Manikáne ehwéh iraru kegá aiq sehiranuro puana amahnágawe ábóraq kékéhre. Mah kehiná kékínánká mi ehwéhnsabé aiq pútare atera sehgigeheéna Manikánka koreríero aítaráire.

27 Manikánka webataq mía míaéna aiq moke ah tebehre. Sísa Karáhéga miraúnsabe itega Maniká Iteribonsabé ahriahri iwíáh íwíáh atanéhe. Aiq míre.

**Manikáne O Ehwehne
God's New Talk: The New Testament in the Awa
Language of Papua New Guinea
Nupela Testamen long tokples Awa long Niugini**

copyright © 1974, 1997 Wycliffe Bible Translators, Inc.

② Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 28 Dec 2024 from source files dated 31 Aug 2023

9673cf68-887a-574e-9ac8-846469c86b12